

東  
華  
續  
錄

東華續錄

同治七十一

臣王先謙敬編

臣張式恭恭校

三月己酉朔李鴻章奏二月十八日劉松山郭寶昌喜昌程文炳與豫軍張曜宋慶追賊至饒陽南旺等處劉松山等先破賊踞村莊十餘處斃悍賊數百名張曜等復由北面繼進生擒數十名該逆向南敗走十九日郭松林楊鼎勳整隊迎擊馳五十餘里探賊復橫折西北追至深州東北之李家村賊回馬抗拒楊鼎勳等飭馬隊馳進步隊接應郭松林等親督李長樂等從旁鈔擊令馬隊合擣中開槍擊矛刺斃賊千餘名騎兵衝入亦生擒數百名賊卽敗退我軍乘勝排壓追十數里張曜宋慶兩軍亦至賊奔往東南復由深州南竄晉州界內二十一日郭松林等馬隊遇賊於范家

村收降鄧新樂等一百餘騎張曜宋慶等趕至晉州西北攔剿該逆又折竄東南二十二日竄近武強之小範河口二十三日賊又由饒陽徑奔肅甯張曜宋慶急馳百餘里鈔出賊前探知是夜賊踞饒陽東北元城一帶遂知會劉松山郭寶昌等乘夜兜襲立將僞懷王邱得才僞幼沃王張五孩所踞兩大莊同時攻毀邱逆一股殲除殆盡張總愚仍伴命迎敵經張曜宋慶督軍鏖戰一時之久賊始亡命狂奔追殺十餘里賊屍枕藉餘匪悉向西遁計生擒長髮悍匪二百餘名賊勢衰蹙從此必難復振又據安平縣探報賊於二十四日由該縣竄祁州深澤二十五日竄晉州境聞已由棗城渡河又據武邑縣陸時言稟報探得捻逆於二十七日在晉州棗城交界樓上村偷渡滹沱河追兵已至賊多淹斃已渡之賊均向南竄各等語臣見駐景州距西路稍遠俟郭松林等續報戰

狀隨時具奏 上諭軍機大臣等郭松林等軍追賊於深州李家村等處疊獲勝仗將邱逆一股剿除殆盡張逆率黨拌拒復經張曜等軍擊敗其偷渡滹沱河之賊經官軍追至淹斃不少未渡者亦經圍殺餘賊均向南竄著卽檄飭郭松林等跟蹤緊躡毋任該逆得以喘息賊蹤飄忽能扼之於滹沱北面自易收功若乘閒南趨則竄豫竄東賊勢又形延蔓此事未據左宗棠等奏報卽著李鴻章等會同確查具奏如此時該逆尙未渡河左宗棠李鴻章官文務當懷遵疊次諭旨督飭前敵各軍乘勝合剿仍蹙之滹沱河濱盡殲醜類丁寶楨亦當飭令楊飛熊等實力扼紮並與追剿各軍聯絡聲勢以期面面緊逼使逆蹤不得旁竄儻該大臣等各存意見致已窮蹙之寇復肆鴟張其何以副朝廷之委任耶山東邱縣曲周交界處所土匪滋擾著丁寶楨迅飭各該地方文武會同

王正起將臨清等處匪類認真查拏務期悉數弋獲以絕根株將此由六百里各諭令知之○劉坤一奏捕獲奉新縣教匪張繼生等訊治如律○諭劉崐按捕瀏陽等處會匪○廣江西吉水縣學額三名湖南甯遠六名貴州安化一名○予湖北陣亡提督唐殿魁曹仁美等建祠○庚戌恭親王神機營王大臣會奏據晉州知州稟報二月二十五日午刻城之東北有大股賊匪竄至申刻均向西南滹沱河口相古莊及棗城樓上各河口涉水竄過河南至三更方始過盡並據提督張曜等稟報見在各軍分造浮橋趕緊南渡追剿又據棗城縣稟報逆眾從晉州相古莊過河竄至該縣向東南紛竄各等因臣等查滹沱河南地勢平行逆蹤趨向莫定大名順德廣平見無大兵扼守獲鹿西接晉疆僅有防兵千餘亦覺可慮李鴻章遠駐景州李鶴年回防彰德均距賊蹤較遠若不

跟蹤剿除第以渡河遠竄爲幸則大順廣等處必被捻逆蹂躪相應請旨飭下李鴻章迅卽督兵進擊並請飭左宗棠酌覈見在軍情除劉景芳余承恩等軍暫時毋庸遠調外其餘派赴前敵各軍卽飭趕緊渡河覘賊所向奮力追剿萬不可以見去畿輔稍遠遂形鬆懈至河南山東山西毗連直境處所並請飭該巡撫等加意扼守毋令侵軼以固疆圉官文左宗棠奏二月二十二日捻逆由深州折向東北竄走其前隊至肅甯者二十三日經臣宗棠擊敗復向西南宋慶張曜督軍乘夜追擊將邱張兩逆所踞大村攻毀斬殺無算邱逆一股剿洗殆盡張總愚亡命奔竄官軍乘勢掩殺賊屍枕藉敗賊向北狂奔復遇臣宗棠親軍擊退是役生擒賊眾八百餘人內有賊目張立堂蘇付恩陳小奎等三名張立堂卽七大隊賊酋之一尙有積年髮捻二百十三名均訊明正法陣斃悍

賊甚多奪獲羸馬二千數百匹旗幟槍礮二千三百餘件賊目龐四印率騎賊一百三十餘名脅從難民四百餘名乞降宋慶張曜受之其程文炳一軍二十四日與臣宗棠追賊至安平北之莊河頭一帶偵知賊向西南狂遁程文炳卽飭總兵李得勝等分投鈔擊行十餘里見賊騎二千餘結陣以待參將王心忠等縱馬進擊總兵李振國等兩面齊進槍礮環施賊驚悸敗潰官軍追殺十餘里至深澤縣西之梁村計轟斃及陣斬之賊約三四百人拔出難民三千餘人據難民供稱張五孩受槍子傷故賊騎皆驚惶紛竄不敢戀戰等語宋慶張曜營內尤爲出力將弁謹先行開列籲懇恩施又奏二月十八日之捷郭寶昌向孔家莊進剿賊遁入孔中旺村郭寶昌飭遊擊張傳典入村馳剿張逆率步賊抗拒其義子張和尚與張五孩及賊目張玉率騎賊兩面鈔至降人張九兒指

擊張和尚應槍而斃張五孩等馳奪屍首復經官軍槍斃張玉適  
各軍破賊來會賊大敗南奔據生擒賊供張五孩左臂亦受槍傷  
其小賊目死者甚夥郭寶昌所部陣亡哨長張建業一員傷亡勇  
丁二十餘名二十三日之捷郭寶昌首抵封家村張逆胞弟張三  
及賊目唐玉均中槍斃該處所踞老賊無一漏網並將王莊等處  
賊巢攻毀合併陳明又奏臣宗棠於二月二十八日行抵定州接  
據各路探報捻逆於二十五日在晉州桃園相古村一帶涉淺全  
渡滹沱河南晉州知州陸邦燿稟稱二十五日見賊騎數十成羣  
向西南竄走嗣見大股絡繹而來幼童居多器械無幾盡向西南  
涉水竄渡賊之人馬淹斃甚多滹沱北岸已無賊蹤等語計各軍  
必已陸續追剿二十九日臣宗棠卽向正定進發渡滹沱南剿而  
滹沱北岸未可空虛應請飭涿州等處防軍拔赴保定替出保定



附近防軍進扼滹沱北岸各橋梁淺灘以固門戶至馬隊利於馳逐不宜派令防守擬請悉調過河以利追逐其春壽馬隊請旨飭與劉松山郭寶昌合隊陳國瑞如嫌兵單仍卽令其會合攻剿不必別立一幟其喜昌全福馬隊俟臣宗棠渡河卽令合隊前進賊旣渡河東路有李鴻章大軍迎剿賊必趨重南路應請飭下河南山西各撫臣分別防剿以杜紛竄上諭軍機大臣等張曜宋慶督軍在饒陽東北乘夜擊賊直擣中堅程文炳追賊深澤晉州等處將斷後悍賊痛剿擒斬甚多張曜宋慶一晝夜馳逐一百六十餘里尤屬迅速賊目張和尙張玉均爲郭寶昌所部槍斃張五孩亦被槍傷該逆敗殘已極向滹沱水淺處所竄渡前以滹沱水勢消長靡定諭令左宗棠等務乘水漲之時偪諸河濱迅圖聚殲今賊果由水淺處所涉渡南竄距京師雖屬較遠惟未能在滹沱北

面迅籌剿滅失此機會甚屬可惜渾沱以南地勢平衍若不振奮精神趕緊將此股殄除致令蔓延四竄難於收拾必將該大臣等重治其咎以儆玩泄著左宗棠迅督前敵諸軍儘力追剿毋任喘息並將善慶溫德勒克西馬隊調過南岸與春壽馬隊合軍以利追逐陳國瑞馬步勇隊亦著飭令一體追剿潘鼎新等軍卽著官文飭令移紮渾沱北岸扼要駐紮以防回竄應否調赴南岸之處並著左宗棠酌量調遣恩承所部京兵卽移紮保定一帶與官文安籌駐防丁寶楨所部卽移紮直東交界地方以顧東省門戶並顧河間以南並飭東省各軍嚴扼臨清濮范一帶其定安富和富爾蘇鄭魁士等軍卽著移紮河間以北一帶並著官文恩承安籌調度崇厚所派天津洋槍練隊卽著飭令該統將陳濟清等與定安等聯絡聲勢兼顧津防余承恩唐訓方劉景芳及直隸駐省各

軍均著官文派令扼要移紮接捕河北餘擒土匪兼顧省防李鴻章所部郭松林等軍卽著飭令由滹沱河南迅速前進並著親督所部兼程進剿與左宗棠合力夾擊該大臣等務當戮力同心和衷共濟迅圖蒞事不可稍存意見致誤事機賊勢見當窮蹙北路官兵厚集該逆非東竄臨清東昌卽西竄晉省李鴻章由景州一帶進兵當兼顧東南一路以防捻逆與大名及濮范等處匪徒勾結晉省與直境交界山隘甚多防兵力單尤覺可慮左宗棠見在定州當一面督兵進剿一面兼顧晉省山隘以杜賊蹤西竄其平定遼路各山口鄭敦謹當加意嚴防毋令闖入晉疆釀成不了之局大順廣一帶與豫省交界處所著李鶴年督飭皖豫防軍妥籌堵遏遇賊竄近卽當越境截剿毋任蔓延張之萬所派姚廣武等軍曾否到豫並著李鶴年迅速催過河北一帶歸李鶴年調遣以

厚兵力本日又據英翰奏請回旗穿孝一摺見在捻渡漣沱勢將南竄豫境防務喫緊皖軍牛師韓等部均在河北該署撫見又續派黃秉鈞等軍由陳州北趨衛輝正須大員分路統帶仍著該署撫遵奉前旨回駐汴省與李鶴年協力籌防如遇賊蹤竄近豫疆卽著該署撫渡河與李鶴年會剿俟捻股蕩平後再行回旗補行穿孝以遂孝思將此由六百里各諭令知之○辛亥加賞普濟堂功德林賑米二百石展期兩月○壬子諭內閣張凱嵩奏假期已滿病仍未痊懇請開缺一摺雲貴總督張凱嵩由縣令不數年間洊擢封圻上年簡放雲貴總督疊經諭令星馳赴任乃沿途逗畱屢以病體未痊奏請開缺實屬意存規避有負委任張凱嵩著卽行革職以示懲儆○李鴻章奏據探賊匪被剿情急由晉州境內搶過漣沱河二月二十七日敗賊向南狂奔已至晉甯新河一帶

二十八日由鉅鹿縣屬之官亭五陳等村向西南竄去聞郭松林楊鼎勳張曜宋慶等軍俱由西北緊躡賊後惟該逆均係騎馬亡命狂奔我軍步隊太多倍道急趨未知能否追及查南路直豫交界之內黃臨漳滑濬一帶有皖豫各軍扼紮兵力漸增若賊人數無多似不至遽行竄突惟大順廣各屬虛無一兵臣擬即日督率周盛傳唐仁廉馬步各隊由冀州大名一帶相機進紮設法兜剿並堵該逆回竄東北之路目下賊氛漸遠畿輔無虞擬請旨飭下官文催令潘鼎新善慶馬步等營迅速拔隊南下與臣會於大名再籌調度並請飭山東山西各撫臣嚴防邊境免賊深入爲患上諭軍機大臣等前因捻逆竄渡濬沱曾諭令左宗棠等督兵嚴追乃任捻逆於晉州境內渡河從容南竄官軍未能跟蹤截擊殊屬可恨濬沱以南虛無一兵大順廣各屬土匪甚多周易句結

況西通晉省東接臨清等處賊騎飄忽尤恐紛竄爲患著左宗棠  
李鴻章等同心協力督率各軍迅籌殄滅儻再任賊蔓延必當重  
治其罪晉省平遠各要隘著鄭敦謹加意嚴防並著丁寶楨迅帶  
所部移紮直東交界處所相機防剿捻蹤已由鉅鹿西南竄逸潘  
鼎新善慶溫德勒克西各軍著官文懍遵前諭迅飭渡河南剿不  
得稍涉疲玩致誤事機李鴻章擬赴冀州大名進紮設法兜剿與  
前諭符合卽著照所議辦理潘鼎新等軍南下後並著李鴻章妥  
爲調度恩承卽著移紮保定一帶與官文會商妥籌布置見捻蹤  
旣已南竄近防不如遠剿李鶴年卽著統率皖豫各軍出境迎剿  
以收夾擊之效並著英翰迅赴河北以爲李鶴年聲援毋致闌入  
河北三郡是爲至要將此由六百里各諭令知之○諭劉典奏請  
飭庫克吉泰兼顧省防並請將隨營人員畱陝庫克吉泰劉典奏

同逆竄擾鄜州各摺片陝省同逆飄忽無常意圖分擾腹地劉典見駐三原以資調度著卽督飭各軍加意防剿毋稍疏虞省城重地防範宜嚴劉典一時未能晉省著庫克吉泰妥籌兼顧督率在省司道等嚴密布置慎固城防不得稍有疏懈劉典所請將知府喻步蓮張澧知縣羅重熙周豫剛畱陝補用之處均著照所請分別班次畱於陝西補用已革知縣向世永著准其畱營差遣同逆大股竄陷鄜州並由張家川竄至汧陽屬境又由涇河川什字道一帶向南分竄勢甚剽疾著庫克吉泰劉典嚴飭劉端冕等軍分路進剿迅將各股殲除淨盡以靖疆圉其鄜州城內文武員弁並著該署撫查明具奏見在陝省東西路均形喫緊左宗棠務將竄直捻匪迅速掃除以便移師回陝免致有所牽掣將此由六百里各諭令知之○廣河南鄉試中額三名尉氏滑溫三縣學額各三

名汜水密武陟登封各二名杞鄆陵鄭禹商邱汲新鄉輝延津封邱河內孟偃師鞏永甯商水扶溝許襄城汝郊陝商城各一名江西信豐十名餘干九名○癸丑諭內閣官文左宗棠奏營員疊被民團戕害亟應查辦一摺直隸辦理團練原以保衛地方官兵等過境如有肆行騷擾者亦應聽候統兵大臣按照軍法辦理若如官文左宗棠所奏厯經派出偵探解糧之守備王廣先等在深澤交河等處地方疊被鄉民殺害至數十名之多覈其被害情由並非因騷擾起釁該鄉民等任意妄殺不可不嚴行懲辦著官文左宗棠出示嚴禁以後官兵務當嚴肅紀律各該處鄉民不得仍前妄殺儻有前項情弊卽行嚴拏懲治用遏亂萌並著官文嚴飭各該地方官將各案爲首兇棍嚴緝究辦正定縣知縣鄭兆同於營員解餉過境並不派差護送任令差役羣毆弁勇又不交犯追贓



谷無可辭著卽行撤任畱於地方協緝仍聽候官文等查參辦理  
○官文左宗棠奏臣宗棠由定州至正定接據各統領稟稱賊因  
官軍追急於二十五日由晉州西南之桃園相古莊高堂新莊趙  
園樓上等村逸水竄渡滹沱河各軍追至河干賊之未渡者悉被  
擒斬其半渡之賊官軍以槍礮向中流轟擊人馬顛蹶屍骸枕藉  
二十七日劉松山所部由蕭莊上游逸渡喜昌馬隊繼之郭寶昌  
所部由下游逸渡陳國瑞馳抵河干亦率所部繼之騎賊二千餘  
人伺官軍半渡突出回撲劉松山飭提督陶定昇等奮力迎堵各  
營左右鈔上槍子如雨斃賊甚夥賊始向南敗走劉松山以郭寶  
昌兵力較單派提督蕭章開等繼進策應此郭寶昌所部馬隊先  
至南岸賊騎驟至副將王鳳鳴率隊迎擊賊猶逞兇撲關郭寶昌  
飭參將郭運昌等各帶小隊飛渡副將胡國龍等率大隊繼進先

用擡槍洋槍向上環擊各軍士衝近南岸一擁直前喜昌亦至賊見官軍厚集潰奔向南劉松山郭寶昌等躡蹤緊追以輜重尙在北岸未便遽追收隊暫駐是役陣斬悍賊二百餘名生擒二十餘名午刻輜重渡畢拔隊復行是夜抵趙州之張村二十八日追賊至甯晉之趙莊一帶先是劉松山郭寶昌所部畱守綏德四營自晉入直因師行迅急將輜重分寄趙州派隊守護郭寶昌所帶副將韓尙吉適奉調赴營合隊二十五日由欒城至棗城會同棗城縣知縣陳金式勇練襲賊於角中村斃賊二十餘名生擒老賊五名賊至趙州境劉松山畱守輜重之勇亦出隊擊賊小有斬獲據生擒賊供該逆因軍械盡失意圖復竄懷慶清化鎮伐竹爲矛等語晉省南路亟宜豫防至賊蹤飄忽被創狂竄殊無定向臣等所陳嚴扼滹沱河北岸橋梁淺灘以固正定河間天津三府門戶此

著亦不可緩請飭催分別嚴防以臻穩固臣宗棠擬即過渾沱橋  
馳赴樂城視賊所向傍西路前進適春壽率所部馬隊馳至正定  
即約其同赴樂城喜昌馬隊已過甯晉相距較遠未便拘泥前奏  
再行調回擬仍令其與劉松山等會剿臣宗棠即與春壽合隊以  
免更調之煩臣官文擬即遵旨回駐省垣籌辦防務上諭軍機  
大臣等捻逆竄過渾沱河後官軍在南北兩岸疊獲勝仗見在賊  
在藁城趙州一帶著左宗棠李鴻章懷遵疊次諭旨同心協力迅  
籌殄滅務將此股就地殲除毋任再行紛竄宋憬詩是否亦在賊  
中遇有擒獲賊匪訊供時可得該逆蹤迹著左宗棠等查明一併  
剿除以杜後患見據獲賊供稱該逆圖竄懷慶清化鎮伐竹爲矛  
等語著李鶴年妥籌守禦並迅飭各軍出境迎剿會殄逆氛英翰  
當懷遵昨日諭旨迅赴河北以爲李鶴年聲援晉省南路天井關

風門口等處尤應豫爲之備著鄭敦謹調撥官軍嚴密布置賊蹤  
被創狂竄殊無定向亟應嚴扼滹沱北岸橋梁淺灘以固正定河  
閒天津三府門戶著官文崇厚悉心籌畫分別嚴防官文見已回  
省並督飭地方官購運糧草接濟各軍毋令缺乏已革副都統成  
保著仍發往穆圖善軍營效力贖罪官文所請畱於春壽軍營之  
處著毋庸議恩承卽駐紮保定一帶與官文會籌防守丁寶楨見  
由景德一路前進應如何扼要駐紮之處著該撫覘賊所向相機  
辦理潘鼎新一軍著官文仍遵昨日諭旨飭令由滹沱南岸前進  
會合諸軍迅殲醜類將此由六百里各諭令知之○命五城煮賑  
展限兩月○以劉嶽昭爲雲貴總督岑毓英爲雲南巡撫宋廷春  
爲雲南布政使李元度爲雲南按察使前浙江按察使○乙卯諭軍機大  
臣等崇厚奏練軍剿捕鹽梟獲匪多名續派馬步馳剿並請飭劉

策先查辦團練各摺片上年梟匪竊發屢經直軍兜剿始獲蕩平  
見在捻匪雖已南竄尙未遠離直境天津河間兩府復有鹽匪結  
幫滋事若不趕緊剿捕必致釀成巨患且恐與捻匪互相勾結又  
成不了之局陳濟清所部官軍赴交河泊頭鎮剿捕匪眾五百餘  
人膽敢放槍拒敵守備周永全等整隊奮剿陣斬四名生擒三十  
六名尙未大加懲創崇厚見調劉景芳馬勇並正定練軍馳赴滄  
州南皮交河東光等處會剿卽著飭令該將弁等會同陳濟清派  
出各隊實力搜捕將著名匪首查拏淨盡並飭知縣馬淮督同各  
商巡役購緝密拏毋任漏網此次獲犯弁兵卽照該侍郎所請提  
銀分賞並著官文嚴飭該地方員弁督飭兵役會同派出各軍趕  
緊搜捕嚴杜亂萌前令定安一軍移紮河間著官文行知該將軍  
於抵河間後嚴密堵扼以防他竄上年馬賊頭目王五見在直東

交界地方聚人索馬丁寶楨由河間督兵回顧東境正可乘勢剿捕卽著該撫迅速派隊掩捕悉數殲除至青滄以南之梟匪聚則劫搶鹽店散則溷迹各村兼爲巡役書差所包庇最難搜捕候補道劉策先見在易州以南駐紮著官文速飭該道員統帶所部練勇馳赴滄州一帶查辦團練務使梟匪不得溷迹以清內患將此由六百里諭令知之○諭鄭敦謹奏賊蹤南竄布置晉防各摺片擒逆渡過滹沱向南狂奔見已由隆平竄至鉅鹿任縣沿途詢問彰德路徑左宗棠督兵傍山南追務須盡力攔剿杜賊竄晉之路平定州地南各山隘並遼潞澤及垣曲各關口與直豫交界處所甚多鄭敦謹見已派兵防守著卽飭令帶兵各員認真堵截毋稍疏懈賊騎剽疾異常該署撫當勤加偵探視賊所向隨時相機擇要移紮居中調度免致顧此失彼李鴻章擬由衡冀一帶馳赴大

名等處追剿著卽兼程前進務當與左宗棠前敵各軍迅速會剿不可稍涉遲緩李鶴年見駐彰德正可督飭豫皖防軍越境迎擊並著英翰懷遵前旨星馳赴豫渡河助剿一面飛飭黃秉鈞張從龍等軍迅赴河北以厚兵力晉省兵力尙形單弱左宗棠等總以合力同心防剿兼施毋令捻蹤竄入晉疆爲要並著在直境會兵兜剿就地殄滅永靖逆氛儻推諉觀望任令逆蹤竄及他省致成不了之局恐該大臣督撫等不能當此重咎也將此由六百里各諭令知之○諭庫克吉泰等奏官軍剿賊獲勝克復鄆州城池並麟遊等處剿賊情形各摺片此次同匪突陷鄆州經劉端冕劉厚基等督兵攻克周紹濂等復在吉子峴地方擊賊獲勝大挫兇鋒剿辦尙屬出力惟西路回匪時思東竄著庫克吉泰劉典督飭劉端冕等探賊所向奮力堵剿節節掃蕩以靖疆圉其竄及楊家店

一股既經高連陞擊敗仍著檄令該提督相機進剿毋稍鬆懈北路榆林一帶竄賊近日剿辦情形若何並著妥籌兼顧譚玉龍一軍在麟遊邠州等處擊退賊匪尙爲奮勉該革員前在香花壘剿賊出力經庫克吉泰等奏請開復提督原銜並賞還翎支於二月初四日寄諭內照所請獎勵此次在事出力員弁著准其存記彙案保獎回逆崔三一股見竄汧陽寶雞一帶著卽督飭張岳齡等會合川軍妥籌兜剿迅殄逆氛將此由五百里各諭令知之○丙辰廣江西弋陽縣學額七名○予浙江陣亡知縣李宗謨建祠○丁巳李鴻章奏臣行抵南宮縣據各處探稟賊敗過漳河後經豫皖防軍迎剿獲勝仍向正南逃竄臣前陳管見以懷慶衛輝北阻太行南偏黃河地形較狹各軍若進扼懷慶再派隊蹙之一隅比在直晉圍剿較得地勢昨左宗棠函商方略臣又將此議詳晰與



商頃准李鶴年來函亦以衛懷一帶依山阻河擬聯絡晉省慎守河防但非多兵莫辦等語與臣意見相同惟賊極猾悍見兵卽走有騎如飛未知設法布置能否趕及左宗棠及各省追軍均由磁州彰德循山兜進臣念大名與濮范滑濬毗連恐該逆勾引土匪乘虛回竄直境擬卽督軍由大名相機前進循河入豫之衛輝與左宗棠李鶴年等隨時籌商夾擊以期就地兜圍目下賊蹤愈遠直境稍鬆臣所部兵力尙單應請旨飭催官文迅飭潘鼎新善慶等各隊倍道南下俾資調派上諭軍機大臣等捻逆由成安竄入豫省臨漳一帶雖經官軍疊加剿洗該逆被創狂奔異常剽疾刻下已過衛輝非南撲黃河卽肆擾衛懷等屬李鴻章以懷慶衛輝北阻太行偏黃河地形較狹各軍若進扼懷慶再派隊蹙之一隅比在直晉圍剿較得地勢與李鶴年意見相同卽著李鴻章

李鶴年與左宗棠悉心籌畫合力兜拏爲一鼓聚殲之計並著英翰迅赴河北與李鶴年會商布置掃蕩逆氛李鶴年以剿匪自任務當實事求是迅將此股賊匪剋期殄滅以副朝廷委任儻該匪竄過黃河致滋延蔓必惟李鶴年是問左宗棠在直剿拏既不能在漳沱北岸就地殲除見又著著落後致逆氛復擾豫境儻再不能迅速蒞事自問當得何罪著左宗棠卽在豫省交界處所擇要駐紮妥爲調度一面酌派重兵星速赴晉將各處隘口嚴密扼守以杜該逆竄晉之路並著鄭敦謹仍遵前諭於澤絳所屬各口隘妥爲防守李鴻章卽由大名一帶相機進剿並將大順廣一帶扼要布防遇有賊匪回竄卽行迅速截擊潘鼎新一軍卽著官文飭赴李鴻章營以厚兵力漳沱河以南並著官文嚴爲備禦以防該逆回竄所有善慶溫德勒克西春壽等軍及陳國瑞所部並著官

文左宗棠等飭令迅赴河北懷衛一帶會同豫皖各軍實力進剿  
丁寶楨卽在豫東交界地方擇要扼守遇賊卽擊毋任該逆闖入  
東境所有直隸山東山西各邊界卽責成各該大臣等派兵嚴爲  
防範如有一匪竄逸必惟各該大臣等是問前據官文左宗棠奏  
深澤等處剿擒獲勝業經明降諭旨將宋慶張曜獎敘此次李鶴  
年請將該提督等優加獎勵之處著暫行存記如能將張捻在河  
北三郡迅速剿除定當破格加恩此外尤爲出力員弁俟此股殄  
除後准其彙案請獎將此由六百里各諭令知之○諭傳諭署安  
徽巡撫吳坤修吳坤修奏接印日期並擬移紮壽州一摺皖省見  
距賊氛稍遠而本省善後諸務正宜次第舉辦該署撫以潁州地  
勢不如壽州爲適中之地擬俟布置後親查各屬險隘卽移紮壽  
州該省蒙亳一帶土匪甚多其降卒之散回者亦復不少均宜相

機鎮撫以遏亂萌抵壽後籌濟餉需舉辦善後皆關緊要著卽悉心籌辦直隸見趨河北一帶竄突靡定備或該省邊界有警該署撫仍卽馳回潁州力籌防剿總期軍務地方兩無偏廢以副委任○廣江蘇吳江縣學額六名○戊午諭內閣前據官文左宗棠奏報宋慶張曜兩軍二月十三日在饒陽東北剿賊獲勝逆首張五孩身受槍傷茲復據該署督等奏稱張五孩業被槍子打入咽喉伏誅訊據投誠人眾曹平義等供亦相符張五孩卽張五黑係張落刑胞姪在諸賊中最爲兇悍每遇接仗時首先馳突屢抗官軍見被豫軍殲斃洵足塞賊膽而快人心所有此次接仗尤爲出力之千總汝得林李大川徐效孟等三員著以守備補用並均賞帶花翎以示鼓勵○官文左宗棠奏據成安縣知縣錢敏稟報賊於一月三十日夜竄過漳河劉松山郭寶昌等軍躡蹤緊追等語臣

宗棠於初五日馳抵順德約計初七日可抵河南彰德府見飛咨山西撫臣嚴防天井關封門口各要隘暨所屬河防並咨河南撫臣嚴飭所屬加意防河杜賊漏逸上諭軍機大臣等捻股於前月三十日竄過漳河昨據李鶴年馳奏擾及臨漳地方爲方長華等軍擊敗南竄已過衛輝劉松山等軍追擊均落賊後左宗棠於初五日始抵順德計初七日始可抵彰德距賊更遠逆蹤剽疾異常恐由風門口舊路仍竄晉境天井關亦係由豫入晉要路此外各小口山隘甚多均應到處嚴防著鄭敦謹趕緊督兵扼守不得稍形鬆懈晉省兵力單弱左宗棠當兼程赴豫西傍太行前進豫籌攔截並分撥兵勇於晉豫山路各隘口駐紮與晉省兵勇合力防守以杜竄越逆騎竄向衛懷該處有山河扼阻正可乘此機會蹙之一隅爲聚殲之計左宗棠鄭敦謹務當振刷精神力籌堵禦

儻任賊蹤闌入致成不了之局必惟該大臣等是問黃河正當冰消水長之時李鶴年英翰正可乘勢督兵防守以資扼截其各渡口船隻並著全行提歸南岸儻任賊騎南渡恐該撫等亦不能當此重咎也將此由六百里各諭令知之○庚申諭軍機大臣等官文恩承奏捻蹤南竄會商布置請飭劉策先駐紮省西一帶各摺片恩承率富爾琿督帶所部赴望都駐紮並令博崇武等分紮定州等處均著照所擬辦理官文以省西空虛請令劉策先前往駐紮惟天津等處梟匪復行肆擾剿辦亦關緊要著官文仍遵前旨檄令劉策先統帶所部練勇馳赴滄州一帶相機防剿其省西至滿城沿山一帶應否另撥勁旅前往填紮之處著官文恩承妥籌調度並著崇厚嚴檄派出各軍將該處梟匪實力搜捕勒限殲除毋任一名漏網鉅鹿一帶聞有土匪滋擾李鴻章由衡水冀州前

進正可順道接捕著卽抽撥兵勇認真緝拏以靖地方山東臨清  
另有土匪爲數亦屬不少見聞竄至朝城著丁寶楨探明匪蹤派  
隊掩捕並著官文丁寶楨查明竄擾朝城及鉅鹿之土匪是否卽  
係一股抑另有分股之處迅速覆奏毋得遷延粉飾致貽他患馬  
賊頭目王五見在是否拏獲官文丁寶楨崇厚當飭屬嚴行躡緝  
務期淨絕根株是爲至要將此由六百里各諭令知之○諭鄭敦  
謹奏晉省南路喫緊擬移紮澤州督辦防堵一摺捻逆剽疾異常  
竄踞懷慶不遠晉省澤州之攔車鎮與懷慶接壤該署撫擬移紮  
就急檄調知府陳膺福等赴天井關與參將怡壽協力嚴防親督  
兵勇卽日馳往該鎮地方爲後路策應著卽懷遵前諭振刷精神  
督飭各將弁於晉豫毗連各山隘加意扼守固關等處仍著防兵  
嚴密布置風門口爲該匪往來熟徑並著添派得力將弁嚴防以

杜竄越左宗棠迅遵前旨傍太行前進豫籌攔截隨時知會鄭敦  
謹合力防守務將此股賊匪四面兜圍爲就地殲除之計目下河  
冰雖泮而陝回紛竄靡定河防仍未可弛著鄭敦謹檄飭在防將  
士加意梭巡嚴防該匪偷渡毋稍疏虞將此由六百里各諭令知  
之○諭據理藩院奏轉據土爾扈特札薩克卓哩克圖汗布彥烏  
勒哲依圖呈稱請欽派大臣帶兵進剿烏魯木齊回匪該汗率所  
屬會同進剿並請每年差人進京恭請聖安祇領時憲書及自同  
治三年起應領十三旗俸銀俸段由京賞給請旨遵行等語布彥  
烏勒哲依圖自其祖父渥巴錫投順以來百有餘年安居樂業歷  
受豢養深恩其感激圖報自係出於至誠前次會同和碩特等兵  
於喀喇沙爾剿擊回逆嗣又帶兵進剿伊犁逆回並捐輸馬匹其  
惻忱甚屬可嘉此次又請帶兵進剿烏魯木齊回匪著該衙門傳



諭該汗令其馳驛前赴布倫托海地方聽候該處大臣李雲麟酌量辦理以期事出萬全不至屢遭挫敗所請每年差人進京請聖安及領時憲書著准其照所請行其歷年應領俸銀俸段已加恩交戶部速議該汗所屬人數尙多游牧無資著傳諭該汗於領到時卽行分給各屬以資養贍毋庸由京置辦軍器俟到布倫托海後儘可會合進剿所需軍仗李雲麟等自當籌給也將此諭令知之○諭理藩院奏據土爾扈特盟長布彥烏勒哲依圖來京陛見呈請特派大臣帶兵進剿烏魯木齊回匪該盟長帶領所屬官兵會同征剿並懇請每年遣人來京承領時憲書所有應領歷年俸銀俸段應如何支領請旨遵行等語盟長布彥烏勒哲依圖應領俸銀俸段自同治三年以來未經支領該盟長游牧盡失屬下困苦殊堪軫念卽著戶部酌量情形妥速議奏其本年時憲書並著

欽天監咨交理藩院補給交該盟長祇領惟布彥烏勒哲依圖請  
派大臣帶兵進剿回匪見在既無重兵可派亦無專餉可撥而該  
盟長所屬各旗並厄魯特人眾尙多若聽其任意進兵非特無濟  
於事兼恐內外扎薩克爲其驚疑於大局甚有關繫第畱之在京  
則所屬遊牧人眾日久無人統率又恐滋生事端因諭該盟長令  
其前赴布倫托海地方聽候李雲麟辦理該大臣熟悉西路情形  
卽著悉心籌畫其經過烏里雅蘇台科布多地方並著麟興奎昌  
酌量資送所有該盟長屬下土爾扈特厄魯特遊牧人眾餬口無  
資並著李雲麟等設法接濟就近照料原摺均著鈔給閱看○予  
直隸軍營病故總兵官張詩日祭葬卹廕諡勤武○辛酉諭軍機  
大臣等李鶴年奏豫省兵力足敷剿辦請飭皖軍及清淮防軍停  
止來豫一摺河北地方連歲荒歉見在劉松山等軍俱已追剿至

豫合以該省各軍並英翰所派之方長華牛師韓兩軍兵數已不下數萬當此賊勢衰落之時足資兜剿若令黃秉鈞等軍俱行前進轉恐芻糧不給於事無益所有英翰續派之黃秉鈞一軍卽著畱駐皖境爲豫省南岸聲援其總兵姚廣武等軍並著張之萬飭令在徐州駐紮毋庸馳赴河北李鶴年旣以剿賊自任卽著責成該撫嚴飭各軍勒限殄滅不得徒託空言致令殘燄復張該逆見已竄至懷慶李鶴年亦當迅速折回督剿何以尙在安陽著卽親赴前敵相機調度左宗棠務遵前旨派兵嚴防由豫入晉各要隘以杜紛竄見據生獲匪供該逆有圖由曹州黃河水淺處所竄渡回巢之說亦在意中丁寶楨計已回駐東境卽著督軍嚴防毋令闖入李鴻章見由畿南進發並著迎頭攔截毋任回竄直境儻該逆由豫省渡河卽惟李鶴年是問如果由曹州竄渡則丁寶楨亦

不能當此重咎也慄之勉之將此由六百里各諭令知之○諭德勒克多爾濟等奏匪蹤肆擾請飭陝甘派兵駐防邊內東路一摺回匪久踞甯條梁擾及陝省榆林神木一帶時出草地焚掠邊外地方遼廓僅恃貝子札那格爾第率領蒙兵千餘名東西奔馳兵力實形單薄該逆見有圖竄口外之意揆厥所由總因邊內東路防軍時有時無逆匪方得縱橫肆擾以逞其避實擊虛之計庫克吉泰等所派劉厚基一軍阻於榆林穆圖善並未撥兵援應該將軍等既不能派兵專顧邊外又不能截賊東趨設竟任賊擾及歸綏一帶該將軍等自問當得何罪前諭金順迅赴甯條梁剿賊此時諒已進兵著卽迅速攻克繞赴東路以保完區如甯條梁一時未能收復著穆圖善庫克吉泰劉典迅派得力將弁駐紮東路先將竄踞府谷回匪剿滅鼓行而西與金順一軍收夾擊之效沿邊

一帶仍著德勒克多爾濟桂成飭令札那格爾第等帶兵駐守相機迎剿以杜逆匪紛竄將此由六百里各諭令知之○壬戌諭軍機大臣等本日據鄭敦謹馳奏捻竄懷慶澤州防務危急一招捻逆由臨漳竄至新鄉獲嘉河內一帶邊馬擾及清化鎮距澤州邊隘甚近防務萬分緊要著鄭敦謹兼程馳赴該處督率文武嚴防並添調兵勇分布大小各隘口密籌布置不得稍有疏忽晉省兵力單弱深慮該逆乘隙竄入此時剿匪機宜總以攔截懷慶北面山口爲要務左宗棠當懷遵疊次諭旨迅督兵勇沿山麓一帶星夜前進視賊所向橫截攔剿並著嚴飭陳國瑞飛速馳赴風門口一帶迎頭截擊兼與王巨孝李慶朝等協力防守杜賊回竄晉疆之路毋任遷延推諉陳國瑞卽著歸左宗棠調遣以一事權賊到河內後見又竄向何處李鶴年計可馳抵懷境旣以滅賊自任當

嚴飭皖豫各軍盡力兜剿迅速殄滅毋任匪蹤紛擾並著左宗棠分飭前敵各軍會合截剿迅圖聚殲毋稍稽延縱令他竄將此由六百里各諭令知之○癸亥諭內閣內閣奏庶吉士散館考試詩賦策論先期請旨一摺此次著考試詩賦至策論兩項該庶吉士等業經於殿試朝考時分別考試散館時自毋庸再行覆考嗣後散館舊仍考試詩賦屆期不必奏請以復舊制○諭軍機大臣等李鶴年奏豫軍疊獲勝仗並賊蹤東竄情形各摺片擒匪竄擾滑縣經馬德昭設伏擊敗追至新鄉獲嘉張曜一軍追至距清化鎮四十里之恩村將砍竹之賊擒斬殆盡宋慶由獲嘉追至修武與馬德昭張曜等軍連次敗賊擒斬解散者甚多該逆兇鋒疊挫見由原武陽武循河東竄邊馬已及封邱延津勢將蔓及直東李鴻章見已由衡冀趨向大名著卽趕緊督軍迎頭截擊前經諭令官

文等飭潘鼎新一軍前赴李鴻章營飭善慶溫德勒克西春壽等軍赴河北懷衛一帶此時計尙未出直境正可探蹤迎截著左宗棠李鴻章官文分飭各統將等會合豫皖各軍奮力截剿並著官文懷遵前諭嚴防滹沱以南與李鴻章左宗棠互相聯絡毋任賊蹤回竄直境丁寶楨見在臨清務當督飭東省防軍嚴密扼擊毋令擾及東境逆勢敗殘張總愚已受槍傷正當乘此兵力厚集之時速圖聚殲李鶴年旣以滅賊自任尤當督飭豫皖陝諸軍就地殄除牛師韓方長華兩軍早抵河朔劉松山郭寶昌兩軍在直境時亦頗勇往何以此次捻竄豫疆追剿均落賊後著該大臣督撫等嚴飭各將合力兜剿毋稍鬆勁儻以賊蹤去京較遠稍形懈弛致令蔓延他竄必惟該大臣督撫等是問晉省與豫直交界各山隘鄭敦謹當隨時相機嚴防左宗棠仍當督飭諸軍傍山麓一帶

相機攔截毋稍疏忽前因鉅鹿一帶土匪滋事曾諭李鴻章抽撥兵勇順道接剿曾否捕除淨盡如尙有零星匪徒滋擾著該大臣仍遵前旨迅派將弁認真緝拏該大臣仍當星夜前赴大名西南一帶實力堵扼毋任捻眾回竄句結是爲至要將此由六百里各諭令知之○諭崇實奏抽調川北防兵移顧建南邊防一摺滇省回勢方熾崇實慮其復窺川邊句結越嶲等處夷匪滋擾建南見調周達武抽帶武字八營先赴越嶲剿辦夷匪以清內患著卽飭令該提督將越嶲等廳夷匪實力剿除總兵劉寶國前解鹽源城圍克復鹽井頗屬奮勇所有南路防剿事務並著責成該總兵認真辦理以期得力陝省雖無捻蹤而同匪股數甚多兵力不敷防剿李輝武所部三千人見駐寶雞一帶助守而褒沔爲寶雞後路且當秦隴之衝儻被甘回闖入川北邊防又形棘手崇實見畱



武字數營防守襄沔仍恐兵力尙單該署督當另撥數營添紮該處以資周密儻遇陝南軍務緊急仍著飭令周達武回顧漢中毋得顧此失彼將此由五百里諭令知之○甲子諭軍機大臣等英翰奏近日軍情擬赴衛輝督剿丁寶楨奏帶軍回東分布扼紮並派隊追捕馬賊各一摺捻逆在清化鎮等處經張曜等軍痛剿由原武陽武循河東竄邊馬已及封邱延津英翰見擬渡河協剿卽著馳赴衛輝一帶與李鶴年會籌布置迅掃逆氛其續派史念祖一軍到豫後應否渡河會剿或在黃河南岸嚴防之處並著與李鶴年會商調度張之萬所派張從龍等軍前已諭該漕督飭令在徐州駐紮妥籌布置捻蹤已至封邱延津勢將竄擾直東邊境丁寶楨見駐東昌著卽嚴檄各軍相機防守毋任一賊竄入東境莫組紳王正起兩軍並著飭令在曹州一帶扼紮以杜該逆竄東之

鄂毋庸前赴豫境轉致顧此失彼官文當懷遵前旨嚴防潯沱以南與李鴻章互相聯絡妥籌防剿毋任該逆回竄直境李鶴年當與左宗棠等會商嚴飭各將鎮四面合圍將此股就地殲除毋任再行旁竄懷慶陽武等處尙有捻蹤難保不因東北兩路官兵雲集折而西竄左宗棠於山西澤絳各口隘仍當派兵嚴密堵禦直東交界馬賊著丁寶楨認真掩捕並著官文嚴飭廣平大名各屬一體按拏務絕根株鉅鹿等處土匪頗形滋擾著李鴻章探明匪蹤派隊分期以靖地方將此由六百里各諭令知之○諭伊勒屯何瑄奏請飭烏里雅蘇台派兵赴巴城北界防剿並伊勒屯奏請飭撥馬匹暨修補軍械銀兩各一摺巴里坤之北界三塘湖地方爲巴城往來要道本年二月間有回匪百餘人竄往該處肆行殺掠巴城兵力甚單不敷防剿著麟興等迅卽派撥蒙兵一二千名

前赴該處游牧以遏賊匪東西竄伏之路俟大兵出關後再行撤回並著伊勒屯等飛咨成祿文麟嚴飭安敦玉等處文武一體防範毋稍疏虞巴城戰馬短少自應趕緊籌撥卽著麟興等在北路撥給廐壯馬四五百匹以資應用至所需修補軍械銀兩並著麟興等籌撥銀一二萬兩解交巴城俾得將殘破軍器隨時修補如無款可籌卽催山西將應解新疆軍餉迅速撥解由麟興等分撥以應急需將此由五百里諭知麟興錦丕勒多爾濟伊勒屯並傳諭何瑄知之○乙丑諭軍機大臣等左宗棠等奏剿擒獲勝賊蹤東竄見籌兜剿並陳國瑞誘致勇丁截奪軍裝及請將該侍衛酌改副參等官暨兵將追剿情形各摺片捻逆被豫皖各軍截剿折向東趨原武陽武一帶前據李鶴年奏聞曾諭令該大臣會合各軍兜剿並諭官文嚴防滹沱南岸左宗棠西傍太行前進力扼晉

省沿山各隘口著左宗棠官文仍遵前旨嚴飭各軍妥爲防剿刻期殄滅陳國瑞勇而無禮朝廷素所深悉因其前在山東尙能力戰將材難得廢棄可惜令其馳赴前敵假以虛名冀策後效並非寵待優崇不料該侍衛謬妄至此本應量加懲處惟念當剿賊喫緊之時姑示包容陳國瑞本係交左宗棠差遣嗣因逆氛逼近畿輔是以改歸神機營節制今捻蹤既深入豫境卽著仍歸左宗棠節制並著該大臣傳諭令其將神機營前給鈐記繳回由左宗棠派員解交神機營查銷照前敵各將領之例另給木記以資稟報軍情之用軍行以尊卑體制爲最要方得大小相維之道見在營中如都統等官尙歸該大臣督撫節制侍衛雖係京員豈可與欽差督撫平行致紊體制著左宗棠等一一明晰傳諭令其恪遵儻或仍前狂妄卽著治以應得之罪該侍衛所部勇丁並不得逾三

千名之數著左宗棠詳悉查明妥爲裁撤嗣後該侍衛營中軍餉軍械卽由左宗棠隨時撥給此中輕重機宜諒該大臣自能斟酌辦理也劉松山等追賊勞苦情形久所洞悉第捻逆一日不平則宵旰焦勞滋甚該大臣當於拊循之中仍示督飭之意俟逆匪蕩平自當大加恩賚也將此由六百里各諭令知之○諭崇厚奏梟匪被剿逃散見飭搜捕並查辦團練一摺梟匪李瀛山等在泊頭一帶聞拏逃散由崔兒莊遁入杜林東光匪首高言率眾與鹽巡接仗經該縣集團剿捕竄入秦村連鎮官軍雖小有擒斬惟該匪出沒無常兵至則散兵去復聚是其慣技亟應嚴行搜捕著官文崇厚悉心會商檄飭派出官軍探明藏匿處所認真掩捕務絕根株匪首高言李瀛山劉二麻子並著飭令嚴拏務獲毋任一名漏網據崇厚奏稱直隸鄉團良莠不齊往往私行集團製備器械並

有梟匪卽充團長等語見在勦散匪徒難保不涸迹私團潛行詭計著官文等飭令各該地方官將所屬團練悉心訪查務須遴派公正紳士作爲練長不安分者概行斥退其所募人數所製器械均先稟知地方官編造清冊由查辦團練之員親加點驗給與印諭方准舉辦如有匪徒涸迹經練長舉發送官卽與獎賞至各團私殺私埋傷害兵勇等事尤應嚴行禁止以消奸宄而靖地方將此各諭令知之○丁卯諭軍機大臣等劉崐奏楚軍攻克轎頂山等寨防勦邊境請飭川軍會辦上游教匪各摺片曾璧光奏楚軍攻克荆竹園賊巢黔軍防勦開修一帶並防勦安順情形各摺覽奏均悉席寶田督率楚勇將大小轎頂山賊巢先後攻拔陣斬偽帥宋玉山等生擒逆首石廷士馬汶祖正法黃號教匪全股蕩平李元度一軍於攻克荆竹園後復將秦家寨攻拔生擒逆匪秦崽

患剿辦均屬出力逆首劉儀順遁回偏刀水寨李元度見在進攻該處賊寨著劉崐卽飭令該臬司迅速攻克並將劉儀順擒獲毋任旁竄其餘各處匪寨並著分別剿撫早行肅事沅晃靖一帶屢爲黔邊苗匪滋擾劉崐當飭令席寶田將貴東苗匪實力剿洗以淨根株荆竹園潰散餘匪卽著曾璧光商同張文德在開修沿江一帶搜捕務期殄滅淨盡以免蔓延見在貴東等處匪勢日衰楚軍於肅清下游後卽當進規向大坪等處賊巢崇實當飭川省援黔各軍與楚師會合夾攻將上游踞賊次第掃蕩以除積患並著飭令唐炯在貴東一帶籌辦善後事宜安順團匪勾結永甯匪徒攻城肆擾著曾璧光飭令派出援軍與劉嶽昭畱黔之師合力剿除肅清黔西毋任日久滋蔓將此由五百里各諭令知之○于貴州被戕州同雷恩揚祭葬世職○戊辰李鴻章奏臣於三月初十

日行抵大名據探賊已過延津而北漸近直東交界臣飛飭郭松林楊鼎勳由彰德赴滑縣相機攔擊臣由大名前進追行抵南樂縣探知該逆由滑縣東南向東北奔竄擾及直隸開州邊境臣卽由清豐馳赴開州適郭松林楊鼎勳十二日先抵滑縣城西各軍均在賊後緊追郭松林等銜枚急趨折經濬境繞出東北一爲攔擊之師一爲橫截之計行四十餘里次於大邳山賊不虞我軍之繞截而前也郭松林自率馬隊衝入易用剛等分督各營排列疾進衝突踰時易用剛等躍馬陷陣弁勇繼進當者輒靡蔡國祥等各帶步軍乘勝兜擊賊屍枕藉田隴幾爲之滿楊鼎勳督隊由大邳山左橫出截擊賊又悉銳來爭經胡連發等猛擊敗之高占彪等帶隊接應該逆下馬迎戰歷兩時之久楊鼎勳督步隊放連環槍礮傷斃甚眾賊勢大潰郭松林楊鼎勳合力猛追四十餘里劉



松山張曜等軍復由東南節節兜剿賊眾驚亂向西南奔突臣甫至開州派隊向西南搜捕賊已回竄延津封邱一帶臣見飭郭松林楊鼎勳乘勝猛進會合各軍竭力剿辦以期早就殲除惟該逆負創南趨衛輝懷慶以西地形漸狹若難就地殄滅必仍折而北趨查由豫入直分東西兩路由淇縣湯陰赴彰德爲西大道由延津滑潞赴開州大名爲東大道左宗棠由彰德進正當西路臣由開州進正當東路目下賊情未定臣暫紮開州相機督剿仍兼顧東北一面其十三日力戰陣亡之總兵胡家讓副將銜參將夏得勝遊擊周得意羅清瑞應請旨飭部從優議卹 上諭軍機大臣等捻逆由滑縣東南向東奔竄擾及直隸開州邊境經郭松林等軍攔剿獲捷該逆回竄延津封邱一帶惟逆謀甚狡若不就地殄除勢將仍圖北竄左宗棠由彰德前進正可嚴扼西大道之路李

鴻章進抵開州如賊由東大道竄直亦可迎頭攔截著左宗棠李鴻章李鶴年悉心籌商嚴檄各軍四面兜剿務將此股賊匪卽在豫境迅速殲除不容再行旁竄並著官文懷遵前旨嚴防渚沱以南與李鴻章聯絡聲援妥籌布置捻蹤飄忽靡常難保不折而西趨伺隙入晉左宗棠於山西澤絳各隘口務當派兵實力堵禦不可稍涉疏虞英翰見在行抵何處卽著迅赴衛輝一帶與李鶴年合力進兵迅殲醜類豫東交界處所著丁寶楨嚴密防維遇賊卽擊毋任一匪闖入正在寄諭聞李鶴年奏張曜等軍在延津等處剿捻疊勝並牛師韓等分剿續勝一招捻逆屬聚修武迤南一帶經牛師韓窺破賊情合軍追剿將騎賊數千壓退張曜等軍復在延津吳家寨等處連番追擊斬殺無算賊向西南奔竄見在賊勢雖屬窮蹙但恐困獸猶鬬官軍乘勝進剿務當穩慎兜蹙以期計

出萬全著左宗棠李鴻章李鶴年趁此事機順手之時嚴督各軍一鼓聚殲以竟全功儻任賊逸出豫境復成不了之局必惟該大臣等是問將此由六百里各諭令知之○諭宋延春奏迪西逆匪分股圍偏省垣連日防剿獲勝情形一摺本年正月閒迪西逆匪攻撲富民縣城安甯一路亦被該逆黃夜往攻兩城先後失陷該逆遂由團山等處分股圍偏省垣經宋延春添兵扼守並經馬如龍親率將弁攻剿屢有斬獲賊仍分踞梁家河一帶堅守不出省城根本重地亟應設法嚴防著宋延春督飭在省文武官紳悉心固守一面商同馬如龍分撥將士將附近堡寨相機攻拔毋任賊蹤久踞牽掣官軍所有富民安甯文武各官下落卽著宋延春詳查參辦岑毓英近在曲靖著卽遴派得力將弁帶兵馳援並將富民等城迅圖克復此次防守富民之文武兵勇遇賊敗走並著該

撫查明整頓以壯軍威劉嶽昭已授雲貴總督黔西道路已通卽著趕緊赴滇會同岑毓英將該省防剿事宜逐一籌辦毋再遷延又片奏提督馬如龍捐助軍餉並勸各回民一體捐輸等語該提督於逆氛密邇之時陸續捐銀三萬兩以濟經費並於迤東迤南殷實回民酌量勸捐尙屬急公可嘉所有此次各該回民捐輸銀數及該提督應行獎勵之處著俟軍務稍鬆由劉嶽昭等查明分別請獎以昭激勵將此由六百里諭知劉嶽昭岑毓英並傳諭宋廷春知之○予直隸陣亡總兵官胡家讓陝西陣亡學正張湘等祭葬世職○己巳官文左宗棠李鶴年奏本月初八日賊騎馳近延津南關初九日劉松山郭寶昌喜昌等趕到知封邱之謝店岳寨陳道趙村康店華莊等處均有賊蹤卽於是夜拔隊迎剿謝店步賊依村結陣騎賊從兩面直前猛衝當經劉松山擊退乘勢猛

追立將陳道康店踞賊一併擊敗時郭寶昌所部正與賊鏖戰提督楊福交等助戰合力擊敗悍賊併歸一路敗逃張總愚見官軍追急喊黨回撲騎賊兩面衝突鈔出官軍之後步賊挺矛猛撲劉松山督隊鏖戰殺賊甚多槍斃賊馬尤夥賊始卻走喜昌等隊合兵追擊二十餘里至封邱之劉古村追殺悍賊不少敗賊向東北竄走劉松山所部提督周盈瑞力戰陣亡並陣亡弁勇十七名郭寶昌因身先士卒思撿逆首張總愚致頭被刀傷骹中槍子傷甚重程文炳一軍初十日抵封邱東北之白臺梁谷一帶賊眾正向東趨官軍出其不意突前迎擊守備韓大武率隊直擣中堅各路馬步分投衝殺約一時許斃賊無數張總愚挾悍賊二千餘騎自東衝至步賊蟻擁繼進圖撲官軍程文炳揮軍迎敵適李得勝率隊馳至內外夾擊韓大武與都司李得勝手刃紅旗悍賊數名賊

勢披靡悉向東北敗走計前後擒斬陣斃及轟傷者約一千餘名  
十二日宋慶張曜均抵滑縣東南吳村一帶該逆先向宋慶所部  
猛撲宋慶督參將劉廷等整隊迎擊擊敗北面之賊擒斬數百名  
張曜督總兵程之偉等帶隊繼進由南兜繞直鈔賊後奮力齊進  
擊敗其騎賊副將蔣東才率隊壓擊該逆三面受敵紛紛敗潰追  
十餘里賊復回拒適劉松山馬德昭馳至賊向東奔程文炳牛師  
韓亦由東南來會該逆復折奔東北竊維近日賊情窮而益悍蓋  
以大河阻其前追師躡其後張總愚嗾黨反噬故其死黨皆乘健  
馬拌命衝突而各軍轉戰日久究不免稍形勞頓各將領急於滅  
賊往往奮不顧身傷折頗多郭寶昌因欲陣擒逆首以致疊受重  
傷能否醫治痊愈尚未可知而該軍追剿正緊之時乏員統領殊  
恐不能得力

臣

宗棠前奏所以不忍過加督責者此也見在郭松

林緘報十二日行抵滑縣擬卽馳赴開州清豐一路進剿李鴻章

十三日已由大名赴南樂開州

臣

宗棠十五日馳抵大名擬卽督

隊前進分道會剿又奏正拜摺聞據張曜等稟報三月十三日劉松山喜昌及郭寶昌所部會同張曜宋慶馬德昭在滑縣封邱之間痛剿捻逆截賊爲二大獲勝仗郭松林楊鼎勳由滑縣之北繞出東南壓剿與劉松山等軍不期而會牛師韓亦率馬隊馳至該逆三面受敵驚惶無措旋向封邱延津之間突竄是役鏖戰極惡殺賊極多

臣

前聞賊由封邱長垣東竄度李鴻章必將亟趨大名

冀與晤商一切見在賊向西南李鴻章聞將回駐大名

臣

仍卽視

賊所向赴彰衛一帶督剿上諭軍機大臣等昨據李鴻章李鶴

年先後馳奏情形大略相同已諭令該大臣等分路兜剿著卽懷

遵前旨嚴飭各軍相機剿辦毋令旁竄致成不了之局見在逆勢

窮蹙拚命很關冀圖逃逸實在意中我軍當於奮勇之中仍寓持重之意劉松山等軍追勦既屬勞苦而郭寶昌因欲生擒首逆致受重傷尤可嘉尙卽著左宗棠李鴻章英翰李鶴年傳諭各將領令其奮勉圖功一俟奏凱必當大加賞賚用酬殊勲左宗棠擬赴彰衛一帶督勦著卽相機馳往逆情詭譎難保不乘虛西竄該大臣務當於澤絳各隘口仍發兵嚴防並著鄭敦謹隨時督飭防軍加意堵扼毋稍大意李鴻章見在東路如賊有東竄之信卽著督兵迎擊並著丁寶楨妥爲防範官文於渚沱南岸務遵歷次諭旨派兵嚴堵李鶴年英翰卽著會同左宗棠所派各軍四面兜勦以期迅奏膚功將此由六百里各諭令知之○予甘肅陣亡參將宋有年祭葬世職○庚午山東巡撫丁寶楨奏官軍追勦馬賊擒斬殆盡見飭按捕並防黃河南岸得旨馬賊雖屬無多仍著嚴飭各



該文武捕除淨盡以絕根株捻逆見在衛郡各邑難保其不思紛竄疊諭該撫嚴防東境著仍遵前旨實力扼堵毋稍疏虞○辛未命禮部右侍郎沈桂芬在軍機大臣上行走○癸酉諭軍機大臣等庫克吉泰劉典奏遵旨兼顧榆林回逆求撫請旨辦理各等語賊匪由神木竄近榆林疊經官軍擊退另有賊股由永濟橋西竄一由歸德奔響水一由波羅向邊牆外長海子等處逃逸庫克吉泰等見飭劉聲集等各率所部分路防剿卽著嚴檄該總兵等聯絡聲援視賊所向迅掃逆氛前諭金順迅赴甯條梁剿賊著該副都統仍遵前旨趕緊進兵將甯條梁力圖攻克繞赴東路以保完區胡世英所部應否將駐紮延安兩營調歸一路之處著庫克吉泰劉典相機辦理回酋禹得彥被擒求撫非真心悔罪者比難保不生反覆著庫克吉泰劉典察看情形如該逆心迹尙屬可靠不

妨予以自新令其緘約回酋率眾歸順用示朝廷寬大之恩儻仍  
心懷叵測著卽將該酋處斬以弭後患總之此次收撫事宜如辦  
理未能妥協致生事端必惟庫克吉泰劉典是問將此由六百里  
各諭令知之○甲戌諭軍機大臣等都興阿奏先行派員詳查邊  
外地勢再行覆勘一摺都興阿以邊外地勢遼遠山川險峻擬先  
派熟悉邊務之員前往靈陽鹼廠旺清等三邊門迤外沿渾江西  
岸詳細勘度俟詳報到日再行覆加履勘卽著都興阿飭令該委  
員等將各該處地勢扼要處所周歷查勘毋稍疏漏該將軍卽可  
俟延煦等到後會同出邊覆勘將展邊一切應辦事宜和衷商推  
務臻周妥不得稍涉推諉將此諭令知之○諭鄭敦謹奏籌備晉  
省邊防一摺捻逆盤踞獲嘉修武境內時竄擾於陽武延津之間  
經官軍緊蹙追剿西竄榮澤東趨滑濟均距晉省邊界不遠時虞

竄入山口總兵劉定發等所募楚勇既抵陝州卽著鄭敦謹迅速催提入省與朱楚和等兵勇嚴防風門口要隘該處爲捻匪經由熟路務須督飭在防將士加緊防範不可稍涉疏懈陳國瑞一軍既可無須徑赴垣曲卽著左宗棠檄令屯紮河內之清化鎮或濟源一帶扼賊之衝該侍衛由晉赴豫所需糧餉軍裝如有落後未經到齊者卽由鄭敦謹酌量接濟以期迅速澤州天井關等處各隘口並著鄭敦謹飭陳廣福等諸軍實力堵遏與陳國瑞一軍彼此聯絡平定遼州等處各山隘該撫亦宜一體嚴防不得以去賊稍遠致形鬆懈左宗棠當仍遵前旨添布諸軍循太行山麓迎頭攔截爲晉邊屏蔽毋稍疏略致誤全局陝省回逆竄擾延榆同州各屬奔突靡定晉省西路河防到處戒嚴該逆見在宜川紛擾距大甯之馬關關甚近鄭敦謹已檄陳湜馳赴該處嚴防卽著飭令

該革員認真堵遏力贖前愆回土各匪既竄韓城邵陽等處與晉  
疆僅隔一河並著鄭敦謹飭令在防各軍加意梭巡其河保一路  
仍當時加警備以固西面毋稍大意將此由六百里各諭令知之  
○乙亥署直隸總督官文奏道員劉策先新募勇隊擬飭駐紮省  
西以資操練得旨劉策先勇隊著准其畱於省西操防並著飭令  
余承恩與天津各軍搜捕鹽匪河間天津各屬團練卽責成博多  
宏武次第舉行務臻妥善毋滋流弊又奏請飭左宗棠李鴻章如  
賊趨近直境派兵協堵批前經疊諭左宗棠嚴扼西路李鴻章攔  
截東路賊蹤如果竄近直境卽著官文等知照左宗棠李鴻章相  
機撥兵與直軍聯絡遏擊淖沱以南一帶仍著官文督飭直軍分  
布防守毋稍疏懈○命朱鳳標爲大學士由吏部尚書遷○丙子諭內閣  
前據楊岳斌林之望互相參奏各款當經降旨交穆圖善秉公查

辦茲據該署督詳細查明並鈔錄楊岳斌林之望親供呈覽據奏  
楊岳斌原參林之望於糧臺支放毫無稽覈一節甘肅省城設有  
楚軍糧臺與該省標兵分局支給迨蘭州兵變以後林之望等稟  
明就所入銀米一律支領並非漫無稽覈原參林之望奏參英奎  
各情均無影響一節前任甘肅按察使英奎辦理糧運局務所派  
委員頗有需索虧那情弊兵變時借爲口實不得謂無影響彭楚  
漢赴援省城時督軍衝入車道嶺獲勝因距蘭州較遠省中無由  
得知實與援省之事無涉並聲明楊岳斌潔已奉公戰功久著林  
之望殫盡血誠克保危城陳奏事件尙屬因公請均免議各等語  
此案楊岳斌等互相奏參雖經穆圖善查明俱屬因公惟以總督  
藩司意見未能和協均有不合前任陝甘總督楊岳斌見任甘肅  
布政使林之望均著交部議處○諭軍機大臣英翰奏皖軍勦賊

獲勝各情並馳赴前敵相機進剿一摺牛師韓等軍在修武一帶擊賊獲勝岳寨等處之賊復經郭寶昌等擊剿大捷惟郭寶昌身受重傷前據左宗棠等馳陳業經諭令妥爲拊循本日復明降諭旨賞假兩箇月俾該總兵安心調理並賞給物件以獎勞勩矣著英翰傳諭該總兵趕緊醫調傷痊後卽奮勉剿賊其所部兵勇卽令總兵郭運昌暫行統帶以資進剿英翰見已馳抵陳畱卽日督軍渡河剿賊洵屬奮勇可嘉著卽督率各軍與左宗棠李鴻章等聲勢聯絡相機剿辦以期迅掃賊氛賊匪見踞獲嘉修武境內時竄擾陽武延津之間著左宗棠懷遵疊諭嚴飭各將弁扼守晉豫毗連各要隘毋任賊蹤闖入李鴻章力顧東路之防毋任竄逸李鶴年以剿賊自任著卽會同左宗棠李鴻章英翰力籌進剿爲一鼓聚殲之計官文著仍遵前旨嚴防漳沱以南毋稍大意儻賊復

北趨仍著左宗棠李鴻章速撥重兵嚴密堵遏將此由六百里各諭令知之○諭穆圖善奏延安防兵疊次剿匪情形並調金順赴陝暨請飭山西巡撫籌解原定協撥各餉江南等省撥解甘餉四川山西籌撥軍火各摺片胡世英一軍駐紮延安止以防陝省北路而逆首董幅祥率股分擾盤龍川一帶擾及安塞邊境勢甚猖獗雖經該總兵疊擊獲勝難保不於甯靈花馬池等處復行煽惑著穆圖善嚴飭該總兵乘機掃蕩以期漸次肅清前因陝西榆林各境逆回勢漸北犯曾諭金順迅赴甯條梁剿賊繞赴東路截擊計該副都統此時當由定邊前進仍著該署督咨令迅速進兵將甯條梁趕緊收復毋任賊勢蔓延胡世英是否捏報邀功並著懷遵前旨切實查明毋稍瞻徇河州東鄉等處應否派兵會剿著該署督悉心籌辦左宗棠見在直省帶兵於甘事勢難兼顧該省剿

辦事宜穆圖善責無旁貸其派兵扼紮北山調回舊部之處卽著  
咨商劉典安爲辦理惟不得偏顧甘境致陝地又患空虛山西應  
解穆圖善軍營月餉三十六萬兩著鄭敦謹迅飭藩司設法籌撥  
遴派委員徑解甘垣毋庸由陝省轉撥其原定協撥甯夏新疆及  
富勒琿各餉亦著該署撫仍照前數按月籌解江南等省欠解甘  
餉甚多著曾國藩崇實鄭敦謹丁日昌李瀚章郭柏蔭劉崐何璟  
各將上年七月以前應撥甘餉如數迅解所有各該省協撥餉項  
劉典務當遵奉前諭飭令徑解漢中不得由陝解交致多周折甘  
省剿回正亟軍火等項不可稍形缺乏著崇實鄭敦謹趕撥火藥  
各二萬斤火繩各二萬盤擡烏槍子各五千斤派員解赴穆圖善  
軍營以利攻剿甘餉奇絀各該督撫務須隨時籌措以濟軍食不  
得視同膜外使甘事益形棘手也將此由六百里諭知曾國藩崇



實穆圖善鄭敦謹丁日昌李瀚章郭柏蔭劉峴劉典並傳諭何璟知之○諭梁肇煌奏西逆圍攻省城請飭督撫大員迅速赴滇一招滇省富民安甯被陷後復於二月初六日易門失守昆陽新興晉甯河西均屬喫緊前據宋延春奏省城危急各情與該學政所奏大略相同見在易門繼陷賊勢益肆蔓延著宋延春懍遵前旨會商馬如龍就見有兵力分路布置防剿兼施迅殲醜類該省被匪肆擾數月以來商賈裹足釐金稀少餉需愈形缺乏若非督撫大員添撥勁旅星馳援救並寬籌餉項接濟省城危殆情形實有不可終日之勢岑毓英務當懍遵前諭帶兵馳援並將富民等城迅圖克復以解省城之危黔西道路已通卽著劉嶽昭趕緊赴滇與岑毓英悉心會商將兵事餉事及一切布置機宜妥籌辦理毋再遷延梁肇煌請將此次防剿出力及捐資助餉各員由該學政

查明奏獎之處著俟軍務較鬆省城解嚴後由該學政會同該督撫擇尤保奏毋許冒濫將此由六百里諭知劉嶽昭岑毓英梁肇煌並傳諭宋延春知之○調單懋謙爲吏部尙書以鄭敦謹爲工部尙書仍署山西巡撫毛昶熙爲左都御史調沈桂芬爲戶部左侍郎以殷兆鏞爲禮部右侍郎由內閣學士遷○以運送甘肅軍糧予阿拉善親王貢桑珠爾默特優敘○予甘肅被戕通判陶壩等祭葬世職○丁丑李鴻章奏三月十六日賊由衛南折竄東北盤旋延津封邱一帶郭松林楊鼎勳繞赴滑縣迎剿適潘鼎新善慶溫德勒克西亦由內黃至滑諸將會議以自滑縣至長垣地勢平曠無可攔制擬就衛河以西黃河以東聯營排紮先扼竄路再圖進剿正商議間賊已突至十九日賊由封邱北趨長垣乘夜折竄滑境二十日楊鼎勳派徐邦道胡連發馬隊迎擊縱橫盪決擒斬數十

名賊退數里忽糾馬步回犯胡連發臂受矛傷裹創力戰楊鼎勳復率高占彪等接應連開槍礮吳雲集大呼陷陣手刃悍酋數名賊向東北竄走郭松林分紮長滑之交是日見賊由滑南突竄馳往策應臣亦自開州添派唐仁廉陳振邦馬勇赴滑協剿行至大河村遇賊唐仁廉首先衝陣陳振邦繼進斬悍賊二十餘名逆股全數來撲陳振邦鼓勇猛進賊以悍騎合力死鬪四面包裹陳振邦衝入賊陣身被數創適郭松林督隊趕至飭宋德鴻等步隊縱橫擊刺易用剛等從旁鈔殺該逆負創竄去潘鼎新善慶等旋自長垣追至會合彥追同抵濬縣賊由濬縣內黃交界圖渡衛河潘鼎新等擊走之臣復派周盛傳吳長慶等由開州帶隊截剿二十二口行抵內黃之七級見賊馬由西南而東北卽率所部攔頭迎擊賊卽敗退向東路竄去生擒賊目許善等十數名賊沿河竄往

內黃三十三日潘鼎新郭松林等恐賊繞由大名偷渡仍循衛河以南兼程緊躡周盛傳吳長慶等由清豐南樂向東分路兜鈔屢獲勝仗臣正慮大名空虛幸河水尚深左宗棠已督隊東下二十二日可抵大名與臣商約臣軍在衛河南岸兜剿左宗棠督軍在衛河北岸夾擊使賊不得徑渡據獲賊供稱懷衛一帶阻山面河地勢至狹恐被圍困故亟圖出險肆竄但冀不至衛運兩河仍不出東豫數郡之地或可徐圖得手提督陳振邦身受重傷旋即殞命擬請旨飭部照提督陣亡例從優議卹同日陣亡之總兵銜副將劉正同遊擊銜都司魯朝斌守備高峻嶺均請旨飭部照例議卹

上諭軍機大臣等捻逆見竄內黃據獲賊供稱懷衛一帶地勢過狹該捻恐被圍困急圖出險此時賊勢雖蹙難保不爲困獸之鬬別逞狡謀李鴻章擬先扼竄路再圖進剿所籌甚合機宜著

李鴻章與左宗棠李鶴年合力籌辦嚴檄各軍穩紮穩進實力兜剿務將此股卽在豫境殲除毋令再行竄出致賊勢復張剿辦又形棘手李鴻章各營在衛河南岸兜剿左宗棠督軍在衛河北岸夾擊卽著該大臣等聯絡聲援遇賊卽擊毋任偷渡英翰已抵陳畱著卽統率所部星速渡河會籌埽蕩逆蹤距東較近丁寶楨當督飭官兵嚴密布置扼賊竄東之路遣員王永慶前經成祿奏調朝廷以其所犯情節較重不准畱營茲旣據李鶴年奏稱打仗尙屬出力卽著照所請將王永慶暫行畱豫帶隊儘不能始終勤奮仍著卽行發遣毋稍瞻徇將此由六百里各諭令知之○諭文麟景廉奏兵會玉門酌商先後馳赴安西並陳伊勒屯等截畱餉銀各摺片哈密必須大員鎮撫疊經諭令文麟等迅速赴任見在景廉亦行抵玉門亟應會合前進雖據報肅逆多騎由南山邊分竄

搶掠文麟等豈得以逆騎飄忽牽制進兵藉詞延緩至伊勒屯等  
前次奏明動用烏里雅蘇台餉銀自因巴哈需餉孔亟亦由文麟  
等久不到任有此那移總之地方爲重文麟等旣節節耽延該處  
亦安能懸餉以待耶惟伊勒屯等所截畱之銀本係文麟等軍營  
專餉伊勒屯等不得概行截畱其應如何兼顧之處著伊勒屯等  
妥籌撥給文麟景廉於接奉諭旨後著卽星速督兵分起前赴哈  
密一切悉心籌辦以重職守毋許在安西逗畱自干重咎所請飭  
撥餉需已寄諭麟興等趕緊籌解此項餉銀解到著文麟景廉與  
伊勒屯等酌量均勻分撥以資應用將此由六百里諭知文麟景  
廉伊勒屯並傳諭何瑄知之○予河南陣亡提督陳振邦等祭葬  
世職○戊寅以孟夏時享 太廟 上前期親詣行禮○恭親王  
神機營王大臣會奏 臣等接據山東巡撫丁寶楨飛報捻逆於三

月二十二日竄至開滑交界二十四日竄至清豐朝城交界二十五日已至東昌府沙鎮地方丁寶楨督飭楊飛熊等開礮轟擊賊向府城東南鄧家林等處肆擾是夜該匪渡過運河以東有奔往平高唐之勢丁寶楨檄飭王心安等隊迅赴在平繞前壓擊並飭沿黃兩岸馬步水師一體嚴防將船隻提歸南岸以防搶渡賊蹤飄忽異常恐由德州一路北趨則天津河間一帶不可不防等語伏查此股捻逆自竄豫境各路官軍雖屢有斬擒究未能痛加懲創今則銳意疾馳各路追兵雖經在後緊躡恐逆蹤迅疾官兵不免節節落後且高唐以北切近景德兩州又去河間天津等處不遠設被侵犯所關甚大即使逆蹤不向北趨山東境內豈堪再遭蹂躪臣等已咨李鴻章左宗棠李鶴年英翰等各飭所部迅卽繞前迎剿或設法旁鈔毋任北犯相應請旨飭下前敵各督撫務各

盡力緊追不准稍事耽延任賊狂竄並請飭下官文崇厚等趕緊撥隊扼要堵截如兵力不敷應由官文等酌覈事機就近調左宗棠等所部隊伍趕前迎剿此次賊由豫境竄入山東究係何隊攔截不力應令各統兵督撫等嚴查奏請重治其罪以肅軍律 上諭軍機大臣等捻逆由滑縣開州等處折擾清豐南樂復由大名趨向莘縣搶渡運河竄至東昌丁寶楨見飭東省各軍分路馳剿黃河船隻一律提歸南岸惟賊蹤剽疾異常運河水勢復淺恐其由臨德一帶北渡撲犯河間或沿河竄向東北擾及天津畿疆重地豈可再任竄擾丁寶楨務當督飭東軍設法攔截杜其北竄之路李鴻章當飭郭松林等軍沿運河南岸儘力追剿或分軍兜截或設法旁鈔總以先杜北犯迅卽撲滅爲要英翰著督率皖軍卽入東境合力追剿宋慶張曜等軍並著李鶴年星催赴東追擊不



得專畱豫境彰德一帶仍著李鶴年派兵嚴防以杜回竄捻逆既到東省此後卽責成李鴻章親督所部迅入東境嚴飭諸將領將此股竄匪就地殲除所有前敵各軍均著李鴻章調度以一事權景州河間等處防務緊要著官文恩承迅速撥軍嚴加堵遏如兵力不敷並著官文等酌量就近檄調以資得力並著左宗棠卽赴直境於直東交界處所扼要駐紮天津地方著崇厚速籌堵禦毋任賊蹤竄入直境姚廣武等軍著張之萬飛飭由徐州北上馳赴東境合剿以厚兵力此次賊由豫直竄入東境搶渡運河究係何隊攔截不力著各該大臣督撫等查明嚴參將該統將等從重懲辦以肅軍律捻逆由直入豫左宗棠不能迅速殲除李鴻章專防直東兩省仍任賊蹤紛竄李鶴年以滅賊自任辦理迄無成效復任竄入東境致追剿各軍均落賊後丁寶楨復不能力扼運防任

賊搶渡均堪痛恨若再不振刷精神力加埽蕩或縱令北犯畿疆南渡黃河以致賊勢益張該大臣督撫等自問當得何罪耶懷之愼之將此由六百里各諭令知之○是月免直隸安州等三州縣積澇地畝上年糧賦蠲緩山東濟甯等四十三州縣暨德州等三衛永利等二場被水被旱被風被蟲新舊額賦陝西甯羌等九州廳縣被水被旱被擾積欠額賦緩徵黑龍江巴彥蘇蘇被雹被蟲上年租賦貸齊齊哈爾墨爾根兩城被旱旗民籽種口糧

夏四月己卯朔諭軍機大臣等崇實奏川軍赴陝助剿連獲勝仗一摺李輝武所部在隴州地方剿回疊勝攻克隴屬之縣頭鎮與劉典等前奏大略相同汧隴之間回氛肆擾雖經川陝官軍會剿稍挫兇鋒該逆遁回隴西仍恐乘隙紛竄李輝武所部見駐寶鳳一帶扼要堵截卽著飭該提督與陝軍聯絡聲勢相機防剿寔沔

僅駐數營兵力尙嫌單薄著崇實仍遵前旨酌量添撥以固川省門戶兼爲李輝武後路聲援建南軍務卽著責成周達武認真勦辦迅速蒞事以便騰出兵力回顧漢中毋得顧此失彼此次攻克縣頭鎮出力傷亡人等著崇實查明分別奏請獎卹將此由五百里諭令知之○諭劉嶽昭奏恭報赴滇日期一摺前據宋延春奏迤西逆匪分股圍偏省垣添兵扼守並據梁肇煌奏西逆圍偏省城富民等城被陷疊經諭令劉嶽昭趕緊赴滇與岑毓英妥籌布置見在該督已將黔省經手軍事料理完竣於三月十六日啟程進駐曲靖岑毓英已帶兵赴省救援劉嶽昭職任封圻責無旁貸卽著力爲其難將省城防守事宜與岑毓英會商妥辦以固根本其省城附近被陷之富民安甯昆陽新興等城及附省賊寨並著該督分撥兵勇迅圖攻克以解省城之危該督見調先鋒各營交

提督李家福統帶先赴曲靖與總兵楊盛宗兵練互相接應著卽嚴飭該提督等激勵兵勇迅籌攻剿以振兵威楚勇二千八百名卽交道員劉嶽曙管帶畱黔貴州龍里貴定等處賊匪該督卽咨照該巡撫提督等派兵籌剿將此由六百里諭令知之○諭伊勒屯何瑄奏擊退哈密回匪請飭催成祿出關文麟景廉等赴哈並催撥烏城等處銀米一摺西路逆回勾結哈密纏頭攻陷駐紮五堡之定西營盤經已革都司趙英傑等帶領勇隊與勇目孔才所部合力夾擊該匪始行退去惟匪蹤飄忽靡定難保不去而復來哈密城池久無大員帶兵鎮守人心渙散勢必另生變故前經疊次嚴諭成祿帶兵出關文麟景廉馳赴哈密諭詞嚴切至再至三該提督等一味疲玩屢次飾詞逗畱深堪痛恨著卽趕緊馳赴哈城不准以後路糧餉爲名託故遷延儻再畏難觀望致哈城復爲

賊踞必將該提督等執法從事決不寬貸該提督等當懷遵疊次諭旨毋貽後悔肅州軍務並著穆圖善催令楊占鼐迅速馳往該處接辦毋稍遲誤巴里坤哈密軍餉缺乏待用孔亟著麟興速撥銀數萬兩趕緊籌解並著文麟將安敦玉糧石速行挽運源源接濟以救眉急不得視爲具文致干咎戾將此由六百里諭知麟興穆圖善成祿文麟景廉伊勒屯並傳諭何瑄知之○英桂奏籌米運京接濟兵食上嘉之○諭吳坤修辦理安徽墾荒事宜○庚辰諭軍機大臣等英翰奏皖軍續獲勝仗見擬親赴衛輝督剿一摺牛師韓等軍在滑縣境內及衛輝城北截剿獲勝黃秉鈞郭寶昌等又在封邱迤北等處獲勝剿辦尙爲得手該署撫就皖軍派出各隊分爲三大軍親率黃秉鈞郭運昌等卽赴衛輝相機督剿賊匪見已竄至東昌搶渡運河前有旨諭令英翰督軍入東著卽

懷遵前諭迅統所部各軍馳赴東境會同李鴻章丁寶楨悉心籌辦規賊所向分投兜剿以期一鼓聚殲郭寶昌傷尙未愈著傳諭安心調理仍由該署撫派員照料以冀速痊將此由六百里諭令知之○辛巳官文左宗棠李鶴年奏三月十三日官軍在滑縣境內剿擒獲勝業已馳陳大略茲據劉松山等呈報十二日張曜宋慶劉松山喜昌等先後行抵滑縣之莫村一帶正駐營間探報賊騎已至官軍合力追擊擒斬頗多十三日五鼓劉松山喜昌等向東北繞進以圖截剿行三十餘里至小寨賊之輜重已悉數前行其馬步悍賊盡伏村中村後伺官軍至遽擁而出賊騎兩旁分鈔步賊直前猛撲劉松山奮力衝擊陣斃馬步悍賊百數十名賊始漸卻喜昌等馬隊復張左右翼以進賊見官軍布隊其左右兩路及鈔過官軍後路之騎賊悉退併一面排列待戰劉松山揮軍猛

進賊殊死鬪官軍愈戰愈奮斃賊甚多賊向西敗走方馬步官軍  
整隊壓擊之際騎賊三十餘團猛撲馬隊先經營總富珠哩等帶  
隊擊敗該逆紛紛北走劉松山喜昌等合軍追殺聞北面礮聲不  
絕則郭松林楊鼎勳兩軍正由北壓剿而南也賊見官軍數面追  
殺折回西南奔竄又值張曜一軍暨西常阿訥蘇肯馬隊自東南  
向西北截出賊愈膽落狂奔官軍乘勝又追二十餘里至滑縣西  
南劉松山等復行二十餘里至劉家村一帶駐紮是役劉松山喜  
昌張曜宋慶各軍共計殺賊一千餘名生擒三百餘名賊目張元  
六邱政洪胡侗吉馬大觀等四名均爲劉松山所部擒斬拔出難  
民以數千計劉松山所部參將唐永清力戰陣亡應請旨交部從  
優議卹以慰忠魂又奏捻逆自三月十三日受創後向西南駛竄  
十五日程文炳一軍行抵衛輝城北十餘里瞥見飛塵蔽天程文

炳嚴陣以待賊果分股猛撲程文炳督隊環擊賊眾卻而復前者  
三皆經擊退時郭松林楊鼎勳兩軍適從西南馳至程文炳飭長  
矛隊乘勢猛進賊向東北敗走馬隊從北面橫截而出騎賊約四  
百餘名殲擒殆盡其大股仍向東北奔逸是役陣斃悍賊三百餘  
名生擒三百餘名轟傷賊馬五六百匹程文炳所部受傷十餘人  
喜昌春山聞槍礮聲催隊前進見賊騎六七團向北飛撲當派富  
珠哩西常阿訥蘇肯等向前迎擊又擒斬五十餘名十七日劉松  
山程文炳全福馳抵延津縣之胡家莊十八日由延津進至陽武  
縣之延川寨適賊已竄至寨西七八里一帶村莊劉松山商令程  
文炳分路並進甫行二里遇騎賊千餘猛撲而來劉松山揮各軍  
急進奮力衝殺截賊隊爲兩段提督陶定升等同時合擊賊勢不  
支紛向東北狂竄斬賊甚多其落後之賊二百餘悉被擒斬追至



夾隄遂收隊駐紮是役計其殺賊三四百名生擒一百七十餘名  
內有賊目趙四保王政三胡老元等數犯立於陣前正法解散脅  
從不計其數總兵何明順單騎陷陣被賊槍子洞胸陣亡臣宗棠  
時在大名營次聞賊趨西南卽於十八日拔隊擬親赴衛輝督剿  
二十一日冒雨至宜溝驛探聞賊騎窺渡衛河卽督馬步各隊循  
河追截賊方於五龍渡口牽船欲渡見官軍馬隊馳近卽棄船登  
岸狂奔未敢渡衛犯直而大股則已向山東朝城冠縣莘縣聊城  
竄走見與劉松山張曜宋慶程文炳晤商飭各軍挑選馬步隊伍  
採備軍食卽日親率渡衛向臨清州一帶前進視賊所向由北面  
壓剿而下與李鴻章南路追軍合力夾擊以期迅殄逆氛 上諭  
軍機大臣等丁寶楨所派王正起一軍並王心安所部於二十六  
七等日兩次剿賊於茌平境內疊獲勝仗惟本日據恭親王等陳

奏接據探報捻逆於三十日竄至茌平德平邊馬已至德州吳橋  
以北東光以南均見火光是東軍雖獲勝仗而逆蹤實已北竄各  
軍仍落賊後此次逆匪狂奔注意河間天津著崇厚迅飭余承恩  
劉景芳陳濟清等軍確探賊蹤迎頭攔截毋令闖入津郡恩承見  
在望都地非扼要並著迅卽整隊前赴河間會同定安鄭魁士等  
妥爲堵剿恩承所統馬步各軍應如何擇要駐紮著該侍郎與官  
文安籌調派該將軍等兵力尙單著官文添撥勁旅協同堵扼以  
固北路前經疊諭李鴻章嚴防東北兩路乃仍令逆蹤紛竄若不  
迅圖補救該大臣問心何以自安見在定安崇厚恩承等軍俱形  
單薄著李鴻章迅督諸軍馳赴吳橋一帶扼要駐紮以爲前敵諸  
軍調度郭松林楊鼎勳潘鼎新等軍已由高唐繞出德州並著該  
大臣飛催繞前迎擊毋許再有遲誤致干重咎丁寶楨責任封圻

不能遏賊東竄致令復擾近畿不得以獲有勝仗稍形鬆懈並不得專候左宗棠李鴻章會商致延時日著卽督軍出境追剿以贖前愆並催王正起等先赴直境迎頭攔截以爲北路屏蔽該逆雖全股東竄而追軍趕到恐又折回南擾是官軍徒奔馳道路於事何濟左宗棠著仍酌量情形於直東交界處所扼紮整陣以待所有劉松山等軍卽催令前進到直東後就近歸李鴻章節制以一事權歸左宗棠已入東境追剿卽著英翰移軍於開州大名一帶扼紮以防回竄所有東軍陣亡弁勇著丁寶楨查明奏請優卹左宗棠等另片奏請將陳國瑞歸山西河南撫臣節制等語該侍衛榮驚性成非威望素著者難以震懾其心仍著左宗棠隨時調度不必有所顧忌該侍衛所部勇丁見已逾三千名之數並著左宗棠嚴飭裁汰妥爲辦理毋令滋生事端該大臣身爲統帥不得諉

諸他人爲自全之計侯事定後朝廷自有處置也將此由六百里各諭令知之○諭德勒克多爾濟等奏查探邊防酌將蒙古官兵暫行選調並請飭察哈爾選派蒙兵以備調遣一摺陝西回匪在柳樹澗一帶盤踞並有圖竄包頭鎮之說歸綏沿邊等處防務緊急德勒克多爾濟等將札那格爾第原帶蒙兵及駐紮歸化城之察哈爾蒙兵分別移撥卽著照所擬辦理惟賊蹤飄忽防剿未可稍鬆並著該署將軍等檄飭札那格爾第統帶所部確探賊蹤於附近陝省各要隘認真扼紮一面嚴飭馬陞督率沿河各營將士晝夜梭巡毋稍疏懈其各旗營應領餉銀馬價著札飭歸綏道分別籌撥以資接濟察哈爾蒙兵除病廢撤回外所贖無多著文盛杜嘎爾於察哈爾八旗內酌派馬隊兵五百名配齊軍械並遴派幹員時加操練聽候德勒克多爾濟等咨調文盛等務將該蒙兵

加意挑選毋得以羸弱充數此項官兵赴防時卽著杜嘎爾管帶前往會同德勒克多爾濟等相機攻剿以期得力將此由五百里各諭令知之○署陝甘總督穆圖善奏提督雷正綰剿賊屢勝並解慶陽城圍報聞○予河南陣亡參將唐永清直隸殉難學正于壯圖等祭葬世職○壬午諭軍機大臣等昨據恭親王等奏捻逆竄至莊平德平邊馬擾及德州當經諭令崇厚迅飭津郡防軍迎剿恩承定安等赴河間扼堵官文添撥勁旅協堵李鴻章左宗棠丁寶楨分路防剿茲據崇厚馳奏捻逆竄至吳橋東光一帶請飭南路各軍繞前攔截一摺與恭親王等所奏情形大略相同見在津郡萬分喫緊崇厚雖飭余承恩等分路防剿兵力甚形單薄李鴻章務當懍遵連日諭旨迅督諸軍由直境繞赴賊前與東軍合力夾擊以期迅殄逆氛一面飛催郭松林楊鼎勳潘鼎新等軍繞

前歷勦並著丁寶楨迅催王正起等軍先赴直境迎頭截擊以固畿疆恩承所統神機營各軍移赴河間一帶兵力尙單官文務遵前旨多撥勁旅添赴該處助防毋稍延誤左宗棠仍當酌量情形迅速赴直東交界處所扼紮以防該逆回竄天津防務著崇厚嚴密布置毋稍疏懈東光吳橋並南皮滄州一帶運河船隻均著崇厚迅速提歸津郡以北毋任捻蹤搶渡將此由六百里各諭令知之○癸未諭內閣前因捻匪竄遁河南衛輝一帶疊經諭令李鶴年就地殲除該撫屢次摺奏亦以滅賊自任並稱兵力已敷勦辦毋庸援軍前往助剿乃賊由清化鎮回竄該撫漫無布置任令由滑濬等處沿河東趨既未能痛加勦洗復縱賊竄入東境擾及畿疆張曜宋慶等軍曾否出境繞前兜擊亦未見有奏報貽誤軍情實難辭咎李鶴年著交部嚴加議處左宗棠李鴻章總統諸軍由

東西大道兩路進剿若能嚴密堵截何至任賊回竄見在該巡已  
擾及東光吳橋一帶該大臣等追軍又落賊後調度無方亦有應  
得之咎左宗棠李鴻章均著先行交部議處仍責令該大臣等督  
率各軍繞前兜擊迅將此股賊匪剋期殄滅毋再稽延致干重咎  
尋吏部議上李鶴年照溺職私罪例革職左宗棠李鴻章均元照  
不應重杖八十公罪降二級畱任例降二級畱任得旨李鶴年著  
加恩改爲革職畱任左宗棠李鴻章著照部議降二級畱任均不  
准抵銷○李鴻章奏賊蹤初欲循衛河北竄三月二十二日正在  
內黃之五龍口試淺偷渡善慶溫德勒克西馬隊馳及賊見步軍  
尙遠遂糾馬賊數十圍散轡齊上猛力迎戰並分股繞出陣後意  
圖包裹善慶等各率所部分擊頗有斬獲潘鼎新郭松林等督隊  
馳援善慶等知有援軍從圍中突出夾擊降其僞天將熊大海騎

賊百餘人餘賊潰遁東北二十三日賊竄南樂清豐之交周盛傳  
吳長慶帶隊趕至擊斃馬賊數十名生擒賊目徐老滑等數名就  
地正法又追二十餘里至南樂縣東遇賊騎萬餘合力壓下周盛  
傳當令馬隊撤回依護步隊進戰賊見我軍馬步齊上悍賊數千  
下馬持矛蠶擁死關經營官賈起勝等奮勇迎敵自未至申盛戰  
兩時之久賊大潰走我軍乘勝掩殺計斃悍賊千餘名並斬賊目  
張丑等數十名賊連夜遁往山東莘縣境內潘鼎新郭松林楊鼎  
勳善慶等恐其乘隙渡衛是日循河岸追至莘冠交界二十五日  
賊卽直奔東昌前股已由東昌城南十餘里李海務一帶渡運東  
趨我軍於午後追及該逆率悍黨迎戰易用剛等排隊進擊賊屢  
衝不動徐邦道等各率馬隊從旁鈔截陣擒悍目何士喜周久等  
數名殺斃老捻數百名各軍在東昌略購行糧仍圖繞出賊前向



南壓勦臣查賊勢雖甚窮蹙惟步賊悉改爲騎日馳百數十里官軍急追常苦尋戰不得偶一接仗其悍賊多下馬抗拒我軍須馬步並進方可制勝步隊晝夜飢驅實形疲乏東直交界地勢平曠無險可扼殊爲焦慮左宗棠見督劉松山張曜宋慶程文炳各軍由大名循衛河東北截擊以堵北竄臣亦飭郭松林楊鼎勳潘鼎新等會合東軍繞由北路向東南兜勦臣拜摺後卽日啟行進駐東昌一帶就近相機調派仍隨時會商左宗棠等妥籌酌辦其力戰陣亡之卽補協領常通阿等均請旨飭部從優議卹上諭軍機大臣等捻逆由山東德州擾及直境之吳橋東光一帶津門防務萬分喫緊見聞逆蹤益向北趨距津郡愈近京畿東南面甚形空虛左宗棠等督兵防勦未能在豫境滅賊致令由大名東昌竄及近畿儻再不振奮精神認真設法繞前攔截自問當得何罪前

據丁寶楨奏郭松林楊鼎勳潘鼎新等軍已於前月二十六日由博平高唐繞向德州迎剿何以此時尙未繞出賊前著李鴻章迅飭該將領等不分晝夜盡力繞前務由西北壓向東南先固近畿門戶該大臣見赴東昌去賊甚遠著卽懷遵前旨卽赴景德一帶駐紮調度不可稍緩須臾丁寶楨當迅督王正起王心安莫組紳等所部馳赴河閒等處防堵恩承計已移紮河閒著與定安等會商將河閒迤東沿運河一帶視賊趨重處所相機扼截與東軍聯絡聲勢官文見派總兵劉祺所部練勇三營移赴河閒著卽飭令星夜前往與恩承等軍合隊嚴防直境兵力未厚左宗棠當由西南一路督軍疾馳東北屏蔽畿疆並著崇厚嚴防津郡分飭余承恩等軍與李鴻章前敵諸軍會合夾擊見在賊勢逼近肘腋剽疾異常該大臣督撫等均宜各知緩急連夜催軍北上毋待朝廷敦

促也英翰當已遵奉疊次諭旨督率皖軍馳赴東境著卽迅速前進分路趨向德州武定一帶儻遇賊蹤回竄卽可迎頭兜擊與李鴻章所部圍剿以圖聚殲將此由六百里加緊各諭令知之○諭鄭敦謹奏布置澤州防務並擊退搶渡回匪一摺捻匪見由東省竄擾直境距晉邊較遠澤州防務業經鄭敦謹分投布置卽著責成該署撫認真防範毋以賊氛漸遠稍形鬆懈陝省宜川等處回匪勢甚鴟張竟在七郎窩對岸結筏搶渡雖經已革臬司陳湜督兵擊退難保不乘隙復來著鄭敦謹嚴飭陳湜督率將弁加意防守不得掉以輕心再干咎戾晉省西面各屬與陝省延榆綏等處僅隔一河地段綿長必須添兵協守鄭敦謹見已檄令王巨孝帶兵五百折回甯吉一帶協防並將道員吳光春新募勇丁三千名分部沿河上下兵力稍厚然遠防不如近剿陳國瑞所部自可先

其所急飭令前往吉州一帶渡河而西將宜川等處回匪相機截  
剿以固晉疆劉典當檄飭陝軍與該侍衛聯絡聲勢兩面夾擊務  
將此股回逆剋期殲除毋任蔓延陳國瑞既赴秦晉毗境剿賊距  
左宗棠軍營日遠一切進止機宜著暫歸鄭敦謹妥爲調度軍餉  
軍火亦著隨時撥給安住所部卽著在清化鎮屯紮以杜捻逆回  
竄將此由五百里各諭令知之○予山東陣亡副將嚴鴻猷等祭  
葬世職○甲申諭軍機大臣等恭親王等奏捻超南皮東路防務  
喫重擬將京兵酌量調撥崇厚奏津防喫緊調軍會合防剿並續  
奏賊撲靜海迎剿獲勝津郡情形萬急各一摺捻逆大股由南皮  
竄至靜海雖經陳濟清擊退而該逆繞赴東北距津十二里之稍  
直口已見邊馬津防情形萬分喫緊況刻下漕船連檣北上正在  
驗收轉運之際天庾正供尤關緊要著崇厚就見有兵力分路防

勦並知會英國法國礮船將濠牆協同守禦以固津防且恐該逆繞赴北路窺伺京畿其害尤不可勝言李鴻章務當懷遵前旨迅赴北路扼要駐紮相機調度郭松林楊鼎勳潘鼎新等軍早抵德州距南皮甚近何以此時尙未繞出賊前會同勦洗實屬意存觀望著李鴻章嚴飭星馳前進一面將該將領等遲延之處據實參奏斷不准稍涉徇隱左宗棠卽由西南一路督軍馳赴東北以衛畿疆王正起王心安莫組紳等軍著丁寶楨飭令迅赴河間等處嚴密防堵扼賊紛竄之路皖軍程文炳牛師韓方長華等豫軍張曜宋慶等並善慶溫德勒克西監春壽等馬隊此時均行抵何處何以未見繞入直境迎頭截擊李鴻章嚴檄催提合力兜勦免致賊勢紛馳益難收拾北路空虚亟應添兵扼守著恩承酌量情形覘賊所向擇地扼紮以固京師門戶其所派防守任邱之兩翼驍

騎營馬隊應否移紮文安與駐守大城之兵聯絡聲援之處並著該侍郎酌度辦理王亮等軍及河西務等處均著照恭親王等所擬妥籌布置香河寶坻甯河等處亦形空虛尤應統籌兼顧著官文酌撥兵勇實力防維並著萬青黎王格吉督飭各該縣民團協同守禦保衛地方毋令匪蹤蔓延及劉祺所部官文卽飭令趕緊移赴河間任邱以北會合恩承等軍嚴防直境毋稍疏懈將此諭知順天府並由六百里加緊各諭令知之○乙酉諭內閣崇厚奏官軍剿擒獲勝力保津郡請將出力各員獎勵一摺擒逆竄犯靜海思渡運河西岸本月初五日經總兵陳濟清派隊堵遏副將鄧啟元統率所部在甌垓小灘等處迎賊鏖戰力挫兇鋒該逆敗向東南奔竄津郡以安洵屬奮勉可嘉自應量予獎勵以昭激勸見在郭松林潘鼎新等軍已到津郡卽著崇厚督飭陳濟清鄧啟元等

趁此聲威聯絡諸軍務將此股捻逆迅速殄除以清畿輔此次逆匪猝犯直境逼近津門追剿各軍均落賊後總由各該大臣等去前敵太遠以致各將領進兵紆緩不能力遏狂氛李鴻章左宗棠等務當迅赴前敵嚴督各軍實力兜剿以贖前愆毋再遲延致干重咎○諭軍機大臣等恭親王等奏軍情緊要添撥隊伍並請飭催追軍羅惇衍奏商辦保護海運米石並定安奏見籌河閒防堵事宜崇厚奏津軍擊賊獲勝捻向東南敗竄各一摺捻股竄逼天津思渡運河西岸經崇厚派令總兵陳濟清等迎擊獲勝賊向東南敗走該侍郎力保津郡痛挫賊鋒深堪嘉尚仍著檄飭陳濟清等確探賊蹤相機堵截郭松林潘鼎新等軍見已陸續抵津是官軍聲勢較壯而賊走濱海一帶其勢漸窮李鴻章務當懷遵疊次諭旨妥籌方略迅赴前敵嚴飭郭松林等跟蹤追擊蹙之海隅使

該逆不得逞其奔突一鼓蕩除左宗棠行抵何處何以數日並無奏報著卽迅速北上並飭令劉松山等趕緊北來會同勦擊河間一帶空虛昨諭丁寶楨飭令王正起等軍迅赴河間扼賊紛竄著卽星馳前進毋再遲延其程文炳各軍著英翰催同夾擊並張曜宋慶等軍均著李鴻章派員迎提以厚兵力捻股雖竄往東南離津門不遠李鴻章等諒不至坐視肘腋之患故作遲回也恭親王等奏請飭恩承赴王慶坨等處堵截定安等由河間赴天津一帶迎截刻下賊情稍異難保不東西分竄著恩承確探該逆趨重處所會同定安鄭魁士等聯絡聲勢相機扼紮定安富和鄭魁士等應否仍紮河間之處著恩承等會商妥籌布置劉祺所部勇隊並著定安催赴河間協同防守明慶等所帶各隊均著照恭親王等所擬迅速辦理京城內外尤宜防宵小潛迹亦著各行步軍統領



衙門順天府五城團防一體嚴查毋得虛應故事王正起等未到河間以前著官文酌度情形派兵填紮其附近保定一帶亦不得以賊蹤較遠稍涉空虛天津爲商賈輻輳之地該逆久已垂涎崇厚務須嚴飭在防將士時加防範毋稍疏虞日來頻接奏報尙合機宜嗣後並著將附近軍情隨時馳奏以慰屢繫羅惇衍鍾岱奏保護海運米石情形均屬妥協卽著照該尙書等所議妥爲辦理以期無誤正供將此由六百里各諭令知之○諭曾國藩等籌撥陝西軍餉○丙戌諭軍機大臣等羅惇衍等奏賊偏津門請飭各路官軍合擊並請飭統兵大臣擇要駐紮丁寶楨奏會商分道追賊並催隊赴運東防剿崇厚奏准東各軍見抵津郡分隊兜剿葛青藜等奏遵飭各屬整頓團練並察看堡寨各摺片捻逆竄至津郡稍直口並靜海良王莊等處經津軍擊敗退向東南郭松林等

淮軍見已追抵津郡溫德勒克西等軍亦相繼而進王心安一軍見已馳抵靜海崇厚商同諸軍分路壓剿該逆又向西南竄動深虞繞竄西北左宗棠見已由德州趨向東北著卽沿運河西岸探賊所向力扼運防毋任竄渡北犯定安等軍卽著駐紮河間一帶與左宗棠聯絡聲勢屏蔽京畿東南恩承著於河間以北覘賊所向扼要駐紮毋庸移赴王慶坨並著官文遵奉前旨催令劉祺所部馳赴河間以厚兵力運河以西既有左宗棠軍防堵王正起等軍卽著毋庸趨赴河間著丁寶楨卽督該將領等沿運河東岸向吳橋滄州一帶迎剿見在津郡兵力較厚該逆北竄不遂必沿舊路回竄山東李鴻章見在行抵何處究竟如何調度布置何以未見奏報著卽懷遠前諭迅赴前敵相機扼紮並嚴督各將領迎頭探擊務乘諸軍會集之時或乘夜攻劫賊營或分路圍合三面兜

勦蹙諸海隅就地殄除毋任該逆逸出又形蔓延豫軍張曜宋慶等並春壽等馬隊均著李鴻章嚴檄催提馳抵津郡西南分布兜勦英翰飛督黃秉鈞等軍由黃運之閒北上合力夾擊毋稍遷延並著李鴻章遵奉前旨將程文炳牛師韓方長華等軍就近催提先馳前進遏賊回竄之路郭松林等軍距李鴻章營太遠若無統帥嚴催勢必稽遲著卽就近暫歸崇厚調度卽檄令由西北向東南壓勦與各路援軍合力夾擊力圖聚殲尤須防其繞向津東由甯河一帶北竄該將領等所需軍火糧米卽由崇厚酌量接濟儻不遵調遣致誤事機著崇厚卽行參辦海河一帶仍著崇厚嚴防毋任賊蹤繞竄該處搶船北渡海運米石船隻並著羅惇衍等會商崇厚設法保護毋稍大意李鴻章左宗棠軍報每多疏緩嗣後軍情務當隨時勤奏以慰廑繫不得仍前疲玩順天府屬東南各

州縣團練堡寨卽著萬青藜等督飭各牧令認真興辦並派員分  
路督催仍由該兼尹府尹等察看妥爲籌畫並妥辦粥廠增撥米  
石以濟窮黎毋任失所將此諭知萬青藜王榕吉並由六百里各  
諭令知之○廣江蘇泰興縣學額六名河南中牟一名○丁亥諭  
軍機大臣等官文奏籌防北路飭軍遏截情形並請飭部撥餉各  
摺片捻逆竄至津郡准部各軍業經追及余承恩陳濟清等軍已  
同顧津郡刻下丁寶楨所部東軍已與淮部各軍由運河東岸前  
進左宗棠所部亦由運河西岸前進津郡河間一帶兵力稍厚足  
敷分布官文仍當飭令余承恩陳濟清等相機布守運河北岸以  
防竄渡並飛飭劉祺所部移赴河間任邱一帶與京兵聯絡扼守  
候續有援軍到防卽酌量情形飭令該總兵拔赴武清香河一帶  
防堵省城防務仍著官文在保定妥籌布置務臻周密直隸軍需

用項浩繁前經諭令湖南湖北江西江蘇廣東福建各督撫每省協助餉銀十萬兩期由海道輪船解津交崇厚驗收轉解應用各該省至今尙無報解信息見在待用孔亟著戶部先於部庫內借撥銀三十萬兩迅速解交官文以資應用該部卽嚴催各該省速行撥解俟此項餉銀到津卽由崇厚扣留解部歸款其餘三十萬兩著於長蘆鹽課及天津關稅正款內隨時通融措撥官文當樽節動用支放毋稍冒濫並嚴飭防剿各營將弁會合各軍將此股捻逆迅速殄除毋得糜餉殃民致干重咎將此由五百里各該令知之○左宗棠奏臣抵臨清後偵賊已竄過運河卽由臨清前進三月初四日抵德州偵賊又過吳橋向東北竄走因面商劉松山張曜宋慶各率所部於初五日分兩起取道直隸河閒府景州循運河西岸以向天津喜昌春壽各率所部馬隊作第三起由德

州屬劉智廟向連鎮泊頭臣與程文炳率所部作第四起繼之初六日臣行抵連鎮計各軍亦可銜尾繼至竊維捻逆由吳橋向東北竄走意在徑擾津沽李鴻章所部郭松林楊鼎勳等三軍早抵吳橋聞已向天津進發臣昨在德州晤丁寶楨知已嚴催王正起等繞越賊前以援天津是運河以東各軍雲集臣所部各軍若再由東路繼進則西岸空虛運河水面狹而船隻多勢難斷其西渡僅賊據船西竄河閒保定各屬又將被賊紛擾局勢更壞不若由運河西岸視賊所向相機截擊較爲周妥如確探賊蹤相距不遠卽搭架浮橋東渡會剿至李鴻章前此所商圈制一策雖制捻良圖然地遠兵分與見在局勢不合臣已據所見緘覆矣頃奉諭旨此次賊由豫直竄入東境搶渡運河究係何隊攔截不力著各該大臣督撫等查明嚴參計李鴻章丁寶楨當已據實直陳臣調度

無方不能迅殲由直入豫之匪實爲心疚既不敢飾詞諉過亦不敢希圖引避巧卸仔肩惟有靜聽廷議而已得旨覽奏與昨日丁寶楨奏報大略相同已寄諭該大臣等迅速督兵於運河東西兩岸分路截剿以防北竄著卽懷遵疊次諭旨妥籌辦理毋再遷延致干重咎捻匪由直而豫而東直犯津郡剽疾異常官兵節節落後該大臣旣稱不敢飾詞諉過亦不敢希圖引避巧卸仔肩卽當振刷精神力圖補救迅將此股逆匪聚殲無遺以副委任若再事延緩致令遠颺或任其東奔西突擾及完善震驚畿輔徒事跟蹤尾擊剿辦迄無成功雖廷議寬大亦不能爲該大臣曲爲優容也懷之此旨並著由該大臣鈔給李鴻章閱看○戊子諭內閣前因捻逆紛竄諭令左宗棠嚴防直晉交界李鴻章嚴防直東交界以期分路迎剿乃該逆由豫竄東由東竄直駛至天津附近地方疊

諭李鴻章督率所部前進並將前敵各軍悉歸調度以一事權見  
淮軍雖先後到津而該大臣自三月三十日自開州發報後迄今  
並無奏報未知行抵何處該大臣責任統帥進剿機宜豈宜遲緩  
至此著卽統軍馳赴北路督率各軍扼要駐紮廣籌方略相機殄  
滅其已到之皖豫各軍均著歸李鴻章調度以專責成左宗棠見  
已由德州前進卽著扼紮運河以西分兵追剿丁寶楨亦已進駐  
交河並著該大臣等會商無分畛域互相策應該大臣督撫等均  
受朝廷重寄斷不可稍有推諉趨避儻能一鼓殲除自宜同膺上  
賞若再遷延貽誤亦必重治其罪懷之勉之○諭軍機大臣等崇  
厚奏擬就運河築圍嚴防海河並續奏逆蹤退竄靜海淮軍拔隊  
壓追丁寶楨奏暫紮交河探賊攔截各一摺賊匪大股見在竄至  
靜海東南淮軍郭松林潘鼎新跟蹤壓剿崇厚擬將各路大隊調



集運河挑築長圍倣照上年東省防守運西辦法扼賊竄路再行疊勦刻下賊情既異且長圍工程非旦夕所能蒔事總以嚴飭各軍實力合勦迅圖聚殲爲要著崇厚卽飭郭松林等軍奮力追勦副將莫組紳等軍已抵靜海並著丁寶楨飭令莫組紳王正起會同淮軍合力夾擊迅殄逆氛李鴻章見在行抵何處本日已明降諭旨催令迅赴前敵著卽兼程前進與官文崇厚會籌布置蹙諸海隅爲一鼓聚殲之計丁寶楨卽著暫駐交河視賊所向相機策應王心安等軍自應畱紮運河東岸會同勦辦以防回竄其西岸兵力尙單並著該撫調軍扼堵以資得力賊蹤雖已稍遠而運河海河防務仍關緊要應如何嚴密布置並津郡濠牆以外添挖二道濠溝之處著李鴻章於抵津後會商崇厚酌度情形妥爲辦理左宗棠卽沿運河西岸探賊所向力扼運河爲順屬暨河閒保定

一帶屏蔽該大臣等務將此股迅就殄除儻再縱令北犯震驚輔恐該大臣等不能當此重咎也將此由六百里各諭令知之○己丑左宗棠奏臣於初七日抵交河之文家廟初八日抵青縣之興濟鎮探報賊於初七日自靜海縣東竄至縣屬四當口後隊尙在天津縣屬之衛南窪劉松山張曜宋慶等各率所部於初八日由青縣東北三十里唐官屯渡運河而東向前截剿春壽喜昌臣已飭其星速東渡會合步軍前進惟西岸未可空虛臣擬於初九日由西岸折回過連鎮後始敢東渡督剿蓋必先固直省倥賊趨東南然後可會合李鴻章丁寶楨英翰諸軍蹙之河海間也連日奔馳探悉南皮被陷情形實由余承恩畏賊不前距南皮二十餘里任賊破城飽掠而去張總愚肩受槍傷聞賊中均言張五孩伏誅後張總愚復帶重傷人心慌亂思散者多惟賊中大小頭目多

張姓死黨故受其劫制賊之能戰者不過數千此次句賊犯津實係鹽梟糾眾投入賊夥故賊數有增又從前諸賊盡使長矛此時雙筒洋槍幾於無賊無之是賊已覺復張之驗見在東直官軍實已數倍於賊而士卒轉戰疲勞將領虛報勝捷兩者於軍情實有開繫李鴻章奏臣於四月初六日行至東昌探聞該逆已竄南皮滄州境內距津不遠臣所部郭松林楊鼎勳潘鼎新善慶各軍均當追及左宗棠督劉松山張曜宋慶程文炳等初五日已由德州進景州以北計北路兵力已厚足資堵遏臣深慮各軍趕到賊又折回南擾官軍奔命不遑轉瞬又落賊後正在緘商英翰請其督皖軍進駐臨清豫籌布置臣擬暫駐東昌聯絡諸軍俟賊回竄就近迎擊欽奉四月初三日諭旨以定安等兵力單薄令臣馳赴吳橋一帶扼要駐紮臣卽督周盛波吳長慶等營由東昌啟程馳赴

德州吳橋等處扼紮就近相機調派臣查捻逆久成流寇張總愚

尤極狡猾頻年竄擾北地擄馬最多平原曠野瞬息百里我軍步

隊躡逐實苦不及臣不得已擬爲就地圍制之策疊商左宗棠等

思設長圍以困之無如黃河以北平坦千里網羅難施議者謂就

運河一綫設防蹙之海東一隅較得地勢惟運河自天津至張秋

黃河口計一千二百里內張秋至臨清二百四十里年年黃水倒

灌淤成平陸尤費兵力約須十萬餘人方可分布見計直東豫主

客各軍僅及十萬臣慮其有守無戰潰決爲患左宗棠慮局勢疏

廓難於有成皆係實情或又謂待賊回竄豫境分守漳衛河及張

秋至臨清運隄以蹙之費兵亦近十萬又恐偪賊入晉總之圖局

不得猝成賊騎難禁紛竄卽嚴飭諸軍日以追剿爲事能勝賊而

未足以滅賊久且有疲師覆軍之憂可勝惴惴臣智術短淺於時

勢之難略有所見不敢不據實直陳 上諭軍機大臣等捻逆自靜海縣東竄至縣屬四當口餘股尙在天津縣屬之衛南窪左宗棠見擬由西岸折回過連鎮後再行東渡督勦著該大臣星馳前進會合李鴻章等赴軍蹙之河海之間會籌聚殲昨日又明降諭旨催令李鴻章迅速北路其已到之皖豫各軍均歸調度茲覽李鴻章奏報旬日以來始抵東昌擬赴德州吳橋等處扼紮實形遲緩捻蹤折回北犯剽疾靡定正宜力圖埽蕩保衛畿疆以副委任李鴻章身爲統帥合圍旣無把握斷無任賊縱橫不籌殄滅之理著卽兼程北上與左宗棠和衷商榷視賊所向迅殲醜類儻再遷延觀望致賊四出紛竄該大臣問心何以自安丁寶楨見駐交河卽與左宗棠李鴻章協力同心會籌夾擊英翰所部各營未識行抵何處著卽趕緊前進相機策應前諭恩承於河間以北扼要駐

紮應如何與左宗棠等聯絡聲援協同剿洗之處卽著恩承妥爲調度此次南皮被陷余承恩畏賊不前距南皮二十餘里任賊破城飽掠而去實堪痛恨著崇厚就近查明據實參奏毋稍徇隱據左宗棠奏見在句賊犯津實鹽梟高品所致高品係滄州下窪高家口人糾集鹽梟馬賊約三千人投入賊夥賊數有增等語亟應將梟匪嚴行搜捕方不至互相勾結捻勢復張著官文崇厚抽調官軍會同各該州縣地方官將鹽梟認真躡緝並將匪首高品迅速拏獲以孤捻勢直東官軍實已數倍於賊近聞將領有虛報勝捷等弊著左宗棠官文丁寶楨崇厚於直東將領中查明何員虛冒勝仗任意欺飾卽著據實嚴參以肅軍律儆扶同徇隱別經發覺恐該大臣督撫等不能當此重咎也前月二十六日左宗棠所發摺報尙未遞到卽著查明在何處耽延仍一面另繕復奏將此

由六百里各諭令知之○諭曾璧光奏請飭四川湖南督撫轉飭援黔各軍赴援並鼎照山賊首投誠請將出力陣亡各員獎卹各一摺貴州平遠遵義各屬匪巢與甕開黃越等處毗連並與龍里貴定各逆響應鎮甯踞匪亦未剿盡見在劉嶽昭移師入滇上游無人夾擊自應迅集援兵以資攻剿著崇實劉崐卽飭劉嶽昭席寶田李元度唐炯蹇閻曾志友熊英豪賀連級各軍由秀山等處迅赴安順進擣寶安平越及龍貴苗疆各賊巢以期廓清黔境毋任遷延不進致誤事機各軍未到以前仍著曾璧光督同張文德嚴飭各營將士實力防維其白泥壘投誠苗匪該署撫務飭知府馬應鏜妥爲辦理不可掉以輕心所稱張文德勦辦鼎照山賊匪各情是江內漸可肅清已准將何正觀免罪矣惟何正觀倡亂多年此次儼於兵威率眾乞降是否真心可恃仍著曾璧光妥籌安

插毋令日後再生事端所有沿江營壘並著飭令駐紮開州之戴榮宗認真防範俾免疏虞將此由五百里各諭令知之○予貴州陣亡逆擊馮成龍等祭葬世職○庚寅諭軍機大臣等羅惇衍奏津郡守備情形並撥鹽關各款應用一摺賊匪見由靜海滄州竄至鹽山去津稍遠崇厚當飭令各路援軍馳赴該處四面兜剿力圖殲滅尤須防其回竄毋稍疏虞賊匪是否全竄鹽山滄靜一帶刻下有無匪蹤著崇厚確查具奏鹽山偏近山東該侍郎計已飛咨李鴻章丁寶楨合力堵剿羅惇衍等見擬將津郡濠牆加高培厚並添挖濠溝以資守禦崇厚擬添練洋槍礮勇二營練勇二營並雇借外國輪船水陸兼防均著照所擬辦理所需經費卽著於鹽關兩庫應解本年京餉項下先行借撥銀三四十萬兩剋期舉辦事竣覈實報銷不可稍有冒濫崇實迅撥四川餉銀二十萬兩



瑞麟迅撥廣東餉銀二十萬兩馬新貽迅撥浙江餉銀十萬兩趕  
緊籌備徑解部庫以抵天津鹽關兩稅應解部庫之數並著戶部  
咨催毋稍延誤將此由五百里各諭令知之○諭成祿奏官軍圍  
剿緊急逆黨分竄連日掩襲情形一摺肅州踞匪屢經官軍剿敗  
勢漸解散存城逆黨僅止數千正可乘機攻剿著成祿趕緊激勵  
將士設法環攻迅圖規復南山居民串通竄逆煽動五堡戶民戕  
官滋事該提督親往剿辦陣擒土逆首惡傳三冒料等正法其餘  
金佛寺各堡戶民仍當設法安撫慎重安辦毋再激生事端其逃  
出關外各匪卽飛咨文麟景廉並地方文武沿途截剿關外待援  
孔亟疊經嚴諭成祿帶兵出關該提督一味遷延疲玩飾詞逗畱  
置邊外軍情於不顧殊堪痛恨著卽趕緊帶兵出關將哈城等匪  
迅圖剿辦毋稍遲緩儻再畏難苟安致邊外稍有疏虞必常執法

從事署甘肅提督楊占鼐見在是否啟程著穆圖善懷遵疊次諭旨迅飭該署提督趕緊馳赴肅州接辦西路軍務毋稍遲延將此由五百里各諭令知之○辛卯署安徽巡撫吳坤修密陳防範提督李世忠舊部兵勇情形得旨該署撫當不動聲色隨時嚴密防範毋令滋生事端○命候補鴻臚寺少卿袁保恆赴李鴻章軍營差委○壬辰李鴻章奏三月二十七日郭松林等軍由東園雨追躡二十八日探賊由荏平東轉向西北騎賊數十團隱伏樹林間郭松林飭步隊上前轟擊賊馬卽退列村外潘鼎新楊鼎勳兩軍從旁鈔擊郭松林復調集各部馬隊與善慶溫德勒克西騎兵繞前接戰不及一時逆陣果爲衝動退越數村我軍馬步乘勝合追三十餘里至高唐州之雲家村陣斬悍黨極衆生擒擒日賈託張有得二名二十九日追過平原賊向陵縣吳橋急走是夜四鼓各

軍卽冒雨前進行未三十里與賊相值我軍馬隊蠶擁而上賊騎以長矛回鬪都司邸得功陷陣死之步軍各營趕爲接應鏖戰逾時擒殺甚多賊潰而北走四月初一日欲由東光偷渡初二日賊又由東光境內突犯遼濱均經我軍攔擊賊敗竄南皮是夜賊酋鄧保政率二百餘騎來降初三日潘鼎新商催各軍以賊旣銳意北竄必須繞前鈔截遂循運河東岸徑指滄州適東軍王心安落後起賊求援潘鼎新楊鼎勳兩軍先從左右兩路包裹而進郭松林督所部合之善慶溫德勒克西唐仁廉直從中路壓下分投鈔擊賊乃大潰遂於滄州之花園連奪賊館數處收降張懷慶胡志等數百人初四日賊竄靜海我軍追由唐官呂官兩屯至陳官屯楊鼎勳乘夜襲擊賊目何祿誠等率七百餘騎來降初五日賊竄近天津二十餘里郭松林等趕行百數十里沿路截戰偏賊自北

轉向東南我軍傍晚到津分駐郡城外探賊尙在楊柳青地方伐木結筏潘鼎新等擊走之擬在津門稍辦軍糧再行壓剿見在左宗棠已令劉松山張曜宋慶喜昌春壽各軍由東光南皮循運西節節截剿聞丁寶楨亦督軍由運西繼進德州以下正形空虛臣本日督隊至德扼要暫駐偵察賊蹤再行相機分投截剿其郭松林營內連日力戰陣亡之副將郭文武擬保縣主簿郭士琳擬保副將姚長庚遊擊曾文益都司邱得功均請旨飭部從優議卹上諭軍機大臣等此次郭松林等軍由東昌北上沿途追賊疊勝直抵天津該大臣行抵德州擬暫行駐紮相機派隊進剿雖因該處空虛起見惟該逆已竄鹽山郭松林等軍自當奮力追剿該大臣去前敵太遠各將領無所稟承於軍行不無遲滯著卽懷遵前旨統軍北上扼要駐紮以爲淮皖各軍調度並著會商左宗棠等

互相策應迅籌殄滅逆蹤去津示遠該大臣既抵德州一切軍情務當勤加奏報毋得仍前遲緩將此由六百里諭令知之○諭英翰奏遵旨督軍入東會剿一摺捻逆見由靜海滄州擾及鹽山恐又將回竄東境著英翰趕緊馳赴東昌與李鴻章會商布置視賊所向合力聚殲另片奏奉到三月二十八日寄諭摺片印花拆損郭寶昌賞件僅有小刀一柄餘皆遺失該署撫所發奏報及疊奉寄諭均遲延多日始行遞到等語軍營文報最關緊要驛站任意遲緩必致貽誤戎機著英翰咨會李鶴年會查沿途各州縣將經過驛遞挨站嚴究訊明何站折損遺失並在何處遲延之處即將該州縣按律嚴懲迅速參奏一面仍著兵部由直境各驛挨站查至豫境據實嚴參以肅郵政將此由六百里諭令知之○諭庫克吉泰劉典奏甘回竄擾陝疆連日剿辦獲勝暨慶陽府城失守隨

卽克復各摺片甘回竄擾隴涇一帶經總兵蕭羣魁暨黃鼎等軍分勦疊勝譚玉龍在邠州勦賊忽被賊股包鈔相持一晝夜之久援兵未至譚玉龍等力戰陣亡知縣喻兆奎等率隊追勦殺賊甚多賊向正甯奔竄邠涇毗連處所回蹤蜩集若非痛加勦洗不足以靖陝疆北路邠延一帶土匪甚多回逆尤劇疾異常仍須防其東竄香庫克吉泰劉典嚴飭劉厚基等各率所部相機兜擊毋任竄入北山復形延蔓譚玉龍一軍卽著飭令胡日盛妥爲鈐束並將邠長一路實力嚴防慶陽府城失守當經雷正綰派兵收復該處地方緊要防閑未可稍鬆應如何撥兵堵禦遏賊入陝之處著穆圖善庫克吉泰劉典悉心籌商毋得臨事周章頻煩兵力將此由五百里各諭令知之○復陝西邠州陣亡已革提督譚玉龍原官子祭葬世職諡武壯交國史館立傳副將張士榮等祭葬世職

加等○甲午諭軍機大臣等穆圖善奏官軍自剿回匪克復狄道  
州城並秦州剿賊肅州激變各摺片狄道州回逆甘心倡亂肆逆  
已久經穆圖善派兵會剿屢獲勝仗力將州城攻拔擒斬靡遺實  
足申天討而快人心河州援匪尙有數千潛至北莊其非真心悔  
罪已可概見該署督當細加察度不可爲其所紿總須先將兇悍  
滋事逆回痛行殄盡再准脅從各回投誠不可將就了事秦州回  
匪本係狄河悍黨在山溝內伏劫糧運並圖撲犯秦城經道員豫  
師探蹤會督各隊馳往追擊力行壓退克保州城尙屬奮勇所有  
在事出力員弁准穆圖善彙入克復狄道案内酌保數人毋許冒  
濫仍飭豫師速會各軍將秦州回匪殄滅肅城久未攻拔成祿王  
仁和所部兵勇又復互相爭鬪並激變金佛寺堡居民縱勇在河  
西各村堡焚掠肆擾成祿前已疊次嚴諭催令出關著穆圖善迅

飭楊占鼐馳抵肅州接辦成祿營務以便該提督刻日啟程毋任  
藉詞延宕至王仁和營勇與成祿所部彼此接仗屢撫屢潰漫無  
約束見在逃至甘州駐紮著穆圖善查明啟釁情形據實參奏並  
將逃駐甘州潰勇分別遣撫約束毋任滋事其激變金佛寺等堡  
居民並騷擾清水堡寺處之統將委員等均著飭令楊占鼐確切  
查明實情由穆圖善嚴參重辦不得稍存姑息將此由六百里諭  
令知之○諭蘇鳳文奏越南正貢屆期據情代奏並密陳鎮安防  
剿喫緊應否察看情形再行開關各摺片越南國王阮福時以來  
年己巳正貢屆期請示進關日期具見誠惻前因南太兩郡軍務  
未平該國例貢業經三次展緩見在由太郡至省道路既無梗阻  
自應令其依期入貢以遂其愛戴之忱著蘇鳳文查照向例進關  
之期行令該國王遵照辦理鎮安逆匪吳亞終盤踞歸順等處並



著蘇鳳文督飭官軍迅速剿辦以靖地方越南貢使經由太不憐  
因鎮安鄰氛未靖卽著該撫設法妥爲護送令其繞道前進毋稍  
疏忽至河南直隸等省道路途見無阻滯屆時由該撫咨行經過各  
省督撫一體妥爲護送以昭慎重將此諭令知之○予甘肅陣亡  
副將陳長安等祭葬世職○永定河溢○乙未諭軍機大臣等都  
興阿著迅速來京陛見並著於曾在軍營管帶馬隊將領中揀選  
熟諳得力者數員一併帶領來京盛京將軍著奕榕署理該副都  
統著卽迅赴盛京任事錦州副都統著都興阿派員署理奕榕未  
到任以前盛京將軍印信都興阿卽交額勒和布暫行管理都興  
阿交付額勒和布印信後不必俟奕榕到任接署卽著趕緊啟程  
毋稍遲緩將此由五百里各諭令知之○諭恭親王等奏請嚴定  
剿賊限期丁寶楨奏擬赴東昌布置各一摺賊由天津鹽山擾及

山東之陽信海豐邊境武定一帶見有劉松山張曜宋慶各軍並王正起莫組紳東軍跟蹤追擊靜海滄州一帶亦有楊鼎勳潘鼎新兩軍扼紮以防折竄兵力足敷防剿丁寶楨見因東昌一路空虛慮該逆由此南竄擬帶王心安一軍並郭松林所部馳赴該處著卽在東昌一路嚴密布置不得稍有疏虞致令逆蹤紛越運河水勢消長靡定見在水勢雖旺防務仍未可稍疏著左宗棠督率所部沿運河一帶視賊所向力行堵遏所有沿河船隻著官文崇厚嚴飭該州縣地方官速行提歸西岸以防逆騎搶渡不得有名無實見據恭親王等奏稱探聞賊有回擾滄州之信是否賊匪分股希圖牽掣官軍著左宗棠檄飭各軍就近剿洗英翰當懷遵疊次諭旨督率所部皖軍星夜兼程由豫境馳赴武定迤西迎頭攔擊以杜匪竄至逆騎數月以來二擾直豫東三省奔突數千里來

往自如官軍十餘萬人不能遏其竄越各將領彼此觀望粉飾戰功並有縱勇擾民致百姓戕殺弁兵之事若再日久遷延農民耕作失期恐又別生他變且入夏以後田禾日長賊騎到處潛伏進剿更形棘手況賊股見竄海隅正可乘此機會三面圍蹙就地殄除著李鴻章迅督前敵諸軍步步圍逼合力同心認真剿辦限於一月內將此股賊匪全數殲滅儻能於限內告竣所有出力各將領定必破格施恩優加懋賞如再遲延誤事亦必當重治其罪該大臣前在山東剿滅任賴股匪此次總統北路軍務尤須力加奮勉肅清全局毋墮前功總之剿賊之事惟責成李鴻章一人各將領統歸調遣直東各路分段防剿則左宗棠官文丁寶楨英翰崇厚等任之如賊匪被剿窮蹙由何路紛竄則惟何路官兵是問懷之勉之正在寄諫間據崇厚奏陳截守運河方略並請飭江蘇派

輪船兵下來津巡防一摺該大臣擬於捷地減河起至祁口一帶止起築長圍隄牆先將運河截斷以固北面天津河閒之防再由運河西岸自滄州捷地直抵張秋黃運交流處所沿河西北兩岸連築長圍分撥兵隊聯絡各州縣民團練勇分段固守並請直隸練軍及京營各軍嚴守滄州交河東光吳橋景州沿河西岸一帶令李鶴年英翰所部進扼東昌臨清騰出湘淮大枝勁旅與東省各隊縱橫截剿等語著李鴻章左宗棠官文丁寶楨英翰崇厚迅速會籌辦理直境沿運一帶著左宗棠官文崇厚妥商布置東境沿運一帶著英翰丁寶楨督率所部扼防毋稍疏忽至該逆探知官軍沿河築牆必應併力衝突李鴻章專辦剿賊當迅督諸軍合力進擊使該逆無暇衝突方爲妥善賊蹤逼近海隅著曾國藩丁日昌迅卽派員將上海捕盜輪船架礮配兵星駛來津交崇厚酌

度派令巡查嚴防海口武定之利津大山兩海口船隻甚多著丁寶楨速行提歸南岸毋任賊蹤紛越劉銘傳前在山東剿平捻股於諸將中較爲出力該提督受國厚恩當思力圖報效見在三月假期已滿自當督率所部迅赴北路剿賊李鴻章自應檄催該提督銷假毋俟朝廷諭旨也崇厚原摺著鈔給左宗棠李鴻章官文英翰丁寶楨閱看將此由六百里各諭令知之○諭長善奏布置防守情形請撥軍扼要堵剿一摺捻逆前次竄近津郡誠恐紛擾畿東該副都統請酌撥大兵扼紮玉豐等處以防捻竄東北兩路所陳不爲無見見在捻由鹽山竄入東境距畿東一路較遠自不必再行徵調致分兵力惟賊蹤飄忽靡定防範不可稍疏且永平府屬無業游民較多關內外馬賊伏莽未淨尤當防患未然著長善就見有兵力妥籌布置並須勤加偵探分路梭巡庶期有備無

患以免疏虞將此諭令知之○丙申諭軍機大臣等穆圖善奏各軍渡河西剿獲勝進擣河州東南二鄉一摺官軍克復狄道州後渡河而西續獲勝仗見在進擣河州東南鄉賊巢著穆圖善卽飭派出各軍乘勝進攻節節掃蕩以期次第廓清河東一帶仍酌派勁兵扼守以防該匪鈔襲後路至牟佛諦及燕脂川各部回眾如果真心向化將器械馬匹全行呈繳原不妨網開一面予以自新惟該回性多反覆難保不首鼠兩端別生詭計著穆圖善馳赴狄道察看情形妥籌辦理仍一面督飭官軍將河西布置機宜悉心調度毋稍疏虞將此由六百里諭令知之○丁酉諭軍機大臣等醇郡王奏請停築圍剿捻之舉仍當依限迅圖殄滅一摺據稱崇厚請築長圍不獨工大費繁非旦夕所能竣事卽使築就安有如許兵勇環守且民與賊俱在圍中恐賊之糗糧未絕而民之儲蓄

先空等語捻逆一日不滅閭閻一日不安總須各將領同心協力將此股剋期殄除方爲善策前據崇厚奏請築圍剿捻朝廷恐曠日持久難收實效未經允准嗣據該侍郎陳奏截守運河之方仍恐未必確有把握令該大臣等會籌並一面嚴飭李鴻章迅速追剿左宗棠等實力防守沿運一帶本日據李鴻章奏賊騎飄忽無從圍制張秋至臨清運河二百四十里設防最難費兵最多等語匪蹤剽疾異常朝廷惟以剿賊責成李鴻章防務責之左宗棠等著卽嚴飭各將領等迅圖滅賊築圍之舉著李鴻章左宗棠崇厚等酌度辦理醇郡王所奏不爲無見原摺著鈔給閱看前據崇厚奏請京營各軍協守滄州等處沿河西岸一帶京營派出各軍如全紮沿運西岸則北路大形空虛著恩承仍督各軍在原駐地方嚴密防守毋稍疏忽將此由六百里各諭令知之○李鴻章奏

臣

於四月十二日行抵惠州山東撫臣丁寶楨亦帶隊由交河回德

晤商僉以賊勢回奔自臨清東昌至張秋運河淤涸已久賊所必

經非重兵不能設防適福建提督郭松林統帶所部由靜海滄州

追賊沿運南下道經德州臣卽商令會合丁寶楨馳赴東昌一帶

相機扼紮據探捻逆已於十五日由禹城往平回竄高唐州境郭

松林十六日至高唐當有戰事連接劉松山張曜稟報渡河追往

鹽山初十日接仗獲勝十一日賊奔海豐陽信十二日至武定十

三日至商河沿途疊戰擒斬頗眾訊據賊供張總愚以官軍均偪

運東圖由水淺處急竄運西等語臣查張秋至臨清運河二百四

十里年年黃水倒灌淤成平陸設防最難費兵最多臣先委員弁

在張秋河口挑濬淤沙意欲引黃入運以困賊然黃水僅高尺餘

未能以水爲險議者皆謂賊在東境蹙之河海一隅可圖聚殲臣



等身在行間豈有不竭力籌辦之理但直東交界縱橫平曠七八百里賊騎飄忽無從圍制欲就東海南河形勢必須先扼西北運河聯築長牆絕其出路而尤以東至津沽西至東昌張秋爲兩頭鎖鑰臣正在講求簡捷之法郭松林潘鼎新昨過滄州慮賊回撲津郡因見運河盛漲督率弁勇將滄州迤南捷地壩掘開內有減河一道橫通海濱收豬港約百餘里運水立時灌入深可四五尺潘鼎新已飭該地方官就河東集練築牆若守住減河既斷竄津之路兼可爲滄青靜海屏蔽日令潘鼎新楊鼎勳等暫行察度布置並緘商崇厚派兵接防設法築壩濬淤蓄水使深以爲津畿門戶惟重兵均在前路東昌一帶空虛無備賊必乘虛回擾昨淮安徵撫臣英翰函稱本月十四五日可至東郡當能與郭松林各軍關頭一擊但地面寬平河牆未立難保其不繞由上下水淺處竄

越而西應請旨飭下河南撫臣嚴防內黃滑濟一帶並飭下直隸督臣轉飭大順廣道將衛河南岸船隻盡行提歸北岸豫爲之備賊尙在運東丁寶楨郭松林等折往東昌設與英翰會師堵截賊又折而北竄德州爲北路衝要距賊甚近臣暫帶周盛傳數營駐扼此間偵探賊情再籌調度上諭捻逆由天津一帶竄向鹽山等處經劉松山追剿疊勝該逆以官軍俱在運東仍圖西竄第自張秋至臨清運河水涸黃水未能濟運該大臣見令潘鼎新等軍在滄州扼守減河以杜入津之路並令該藩司等察度布置蓄水並深辦理尙合機宜卽著咨商崇厚妥籌辦理東昌一路空虛無備英翰計日可抵該郡儻該逆竄往正可以逸待勞迎頭截擊卽著該署撫嚴飭各將領整陣以待力挫兇鋒如郭松林一軍趕到並著會商夾擊該逆有圖竄運西之語內黃滑濟一帶亟宜嚴防

著李鶴年飭令防兵認真扼守毋任再行回竄其衛河南岸船隻  
著官文飭嚴提歸北岸以防竄越丁寶楨前赴東昌備遇賊西竄  
卽著會同英翰等分投痛剿劉松山等軍並著李鴻章飭令奮力  
追剿毋令該逆稍停喘息則逆勢漸衰兜剿較易李鴻章見駐德  
州距賊蹤稍近所有一切調度機宜卽責成該大臣就近督飭辦  
理如匪蹤去德州漸遠卽著馳赴前敵督率各將領等迅速奏功  
毋得遷延干咎左宗棠等亦各懷遵前旨嚴扼運防毋稍疏虞是  
爲至要將此由六百里各諭令知之○調張兆棟爲江蘇布政使  
以吳坤修爲安徽布政使仍署巡撫裕祿爲安徽按察使由直隸  
熱河道  
○戊戌左宗棠奏臣於四月十四日行抵吳橋縣見運河水勢  
增長適郭松林自天津南行將抵德州詢知過捷地時已商同潘  
鼎新等將減水河牐掘開洩水靜海青縣滄州一帶藉資障蔽以

見在局勢言之賊自天津入東境東阻大海南阻黃河西則運河一水縈紆足限戎馬之足惟張秋因河流倒灌淤成平陸見值黃運交漲淤沙得水漸潰當可暫斷人行李鴻章見與丁寶楨經營黃運之防英翰又抵東昌兵力更厚東西南三面當可制賊死命北面有劉松山等馬步大隊追壓而下軍情實有可恃頃探悉賊蹤由武定竄及平原禹城之間追軍已踉蹌前進相距不過十里尚未據各軍馳報戰事臣軍與程文炳暫駐吳橋購備行糧一面偵察賊蹤相機進剿又奏正拜摺間接劉松山等呈報四月十一日追賊至海豐陽信賊復南竄劉松山等馬步各軍沿途均有擒斬生擒擒逆一百十餘名而奪其馬內有賊目劉萬落馬玉林兩名當卽訊明正法十二日追及武定府城下賊眾回撲宋慶於城東率隊迎擊斃賊數十名賊之大股向武定城南圖竄而北劉松

山張曜春壽各率所部由城西截擊力斃悍賊百餘名十三日各軍合隊躡追及商河縣北積水窪邊賊倉皇無措各軍奮威衝殺賊勢不支紛紛亂竄馬步各隊於積潦中追殺二十餘里賊屍枕藉斬馘淹斃者約八百餘名生擒約數百名拔出難民一千餘名訊據賊供張總愚仍思由運河西岸竄逸蓋不知運河水勢驟漲也副將沈義勝縱橫血戰中槍陣亡實堪悼惜仰懇 天恩飭部照總兵例從優議卹 上諭軍機大臣等鴻臚寺少卿朱學勤奏請催提督剿賊並暫停直隸六軍各摺片劉銘傳自剿滅賴汶沈等股匪後乞假養疾該員本係直隸提督值捻匪竄犯近畿卽應力疾銷假赴直剿賊以副專閫之寄況見值三月假期已滿若竟晏然安居豈人臣急難赴公之義該提督起自卒伍不數年間擢至提督受恩深重見當捻逆猖獗之際當不至苟且偷安頽然自

棄著李鴻章卽催令該提督迅督所部馳赴直隸山東一帶隨同該大臣剿賊將此股捻匪迅速殄除以圖報稱儻或始終遷延卽由李鴻章參奏以肅紀綱直隸所練六軍規模甫立卽值鹽匪起事捻逆鼠擾勢難按期操練而所需餉銀糜費甚鉅該少卿擬請將六軍暫行停止將派調之遵化等軍應支餉項歸於軍需項下支給以節糜費俟捻股剿盡別圖良策等語練軍爲久遠計用勇不如用兵惟將來軍務平定各營勇丁若何安插亦須籌給應如何籌畫俾無流弊之處著左宗棠李鴻章英翰各就所見會同官文妥商籌辦朱學勤原摺著鈔給李鴻章閱看片一件著鈔給左宗棠等閱看正在寄諭聞據左宗棠奏報馳抵吳橋會剿情形與昨日李鴻章所奏大略相同賊騎剽疾異常不數日間已由武定竄及平原禹城之間必須各軍儘力追剿方可制其奔突該大臣

既稱見在局勢可以制賊李鴻章丁寶楨英翰各路會齊兵力更厚誠不可失此機會左宗棠見與程文炳一軍駐紮吳橋著卽偵探賊蹤相機扼剿嚴守運河西北兩面遏其北竄李鴻章著懷遵前次諭旨嚴督各軍蹙賊黃運之交於一月內趕緊剿辦迅殄賊氛一面咨會丁寶楨英翰力遏運河西面免其紛竄並迅飭各軍分路兜擊共奏膚功將此由六百里各諭令知之○諭劉崐奏楚軍攻克覺林寺賊巢並截擊苗匪獲勝見籌進剿暨查辦瀏陽醴陵會匪情形各摺李元度一軍自攻克轎頂山等老巢後招撫毛家棚各寨並剿撫三角山白茅鋪等三十六寨將偏刀水前路略定焚毀朱村收復覺林寺後路之高臺等處攻克拖尾營並與統帶川軍之道員蹇闇等會合堵剿將覺林寺前壘力行攻拔生擒逆首朱明月剿辦甚屬得手著劉崐卽飭令李元度乘此聲威將

偏場踞逆悉行掃除務將逆首劉儀順擒斬以靖教匪根株至分  
犯兗州沅州麻陽等處苗匪經該處文武各員並席寶田所部分  
路堵擊力加勦洗疊獲勝仗殲斃極多著劉崐卽飭令席寶田等  
軍將黎平苗匪速行擊退進剿寨頭並其餘苗巢務期悉行殄滅  
毋任牽掣援軍西進之路見在川省援軍業已入黔卽著崇實責  
成帶兵之道員蹇閻知府唐炯等將尙大坪玉華山教匪老巢攻  
拔並著曾璧光督派黔軍會合勦辦肅清附省肘腋之患此次李  
元度等並各營出力員弁勇丁著劉崐擇尤分案保獎毋許冒濫  
至湖南會匪屢在瀏陽醴陵滋事見復經該處兵勇團練將起事  
匪犯剿殺多名惟未獲餘黨潛伏尙多仍慮散而復聚著劉崐卽  
嚴飭該地方文武會督紳團設法認真搜捕務當淨絕根株毋任  
一名漏網將此由五百里各諭令知之○予山東陣亡副將沈義



勝貴州陣亡參將周郡耀等祭葬世職○庚子諭軍機大臣等火  
翰奏會商機宜擬馳赴臨清布置並請飭天津撥給米石及南樂  
等處民圩劫斃員弁各摺片捻逆竄向禹城高唐等處前阻黃流  
西北兩面又有運河足資守禦正可乘機兜剿見在李鴻章駐紮  
德州丁寶楨駐紮東昌若英翰移紮臨清足成犄角之勢卽著照  
所議會同李鴻章左宗棠丁寶楨妥籌商辦更番扼守更番輪戰  
以期迅速殄滅此時各路大軍不下十餘萬而捻逆不過數千該  
大臣督撫等屢奏賊勢窮蹙而任其竄突莫可制禦總由各將領  
互相觀望不肯實心痛剿試思合數省兵力剿此殘寇不能及時  
殄滅該大臣等久任統帥捫心豈不自愧卽著李鴻章妥籌方略  
申明紀律奮加勦洗毋得再涉遷延致干咎戾儻任該逆竄渡運  
西必當查明由何路竄逸將沿運督防之該大臣督撫等從嚴懲

處決不寬貸天津賑米尙有存餘英翰軍營需米甚急卽著崇厚撥給一萬石派員解交英翰軍營以資接濟如此項米石不堪食用並著崇厚另籌撥解免致轉折徒煩運費丁寶楨所調吉林黑龍江丹丁馬隊三千名前諭將挑出之一千五百名飭赴直隸交春壽管帶其餘一千數百名丹丁馬隊著訓練餒養以備調遣此項馬隊見紮何處春壽所帶一千五百名能否得力著左宗棠丁寶楨查明覆奏直隸民團屢經戕害官弁前已明降諭旨令地方官嚴行禁止何以此次南樂元城復有此等惡習並敢劫掠銀兩馬匹開槍抗拒其爲地方奸棍已可概見豈可稍事姑容著官文再行飭屬嚴行曉諭務使軍行無阻並恐山東民團亦有此弊著丁寶楨一體飭屬豫行曉示儆敢戕害官弁卽行嚴辦以警刁頑該大臣督撫等亦必嚴飭各帶兵將領於所過圩寨不可騷擾地

方庶兵民相安不致互相仇恨將此由六百里各諭令知之○予直隸被戕運同馬駿祭葬世職○辛丑諭軍機大臣等德勒克多爾濟等奏難民土匪回匪滋擾蒙古游牧見經官軍擊退並籌補馬匹一摺甯條梁等處回匪勾結難民土匪在蒙古游牧邊界四出擄掠該將軍見飭扎那格爾第督兵防剿卽著嚴檄該貝子相機布置遇賊卽擊毋任再行紛竄儻該貝子仍前玩泄未能實力堵扼卽著德勒克多爾濟等據實參奏並飭令貝子巴爾珠爾總兵馬陞一體嚴防毋稍疏懈金順著懍遵前旨迅將甯條梁攻克以便繞赴東路藉保完區並彈壓匪眾不至四出滋擾難民紛竄搶掠多由困苦失所以致流而爲匪並著金順咨商穆圖善派員將收復地方難民未經歸業者妥爲安插撫恤裁撤營勇並給賞令其回籍以免別滋事端札那格爾第所報防兵馬匹多有倒斃

亟應籌補以資乘騎卽著照德勒克多爾濟等所擬妥爲辦理將此由六百里各諭令知之○諭蘇鳳文馮子材奏太郡官軍疊克全茗等處賊巢疏通鎮安餉道蘇鳳文奏鎮安官軍收復東山寨等處並攻克大虎巖見仍督軍進剿各一摺龍州匪股紛擾雖經官軍攻拔下凍巖寨全茗等處賊巢殲擒匪首黃忠傳陳七等多名疏通鎮安餉道而龍英向武鎮遠等土州地方匪蹤嚮聚尤應及早殲除著蘇鳳文馮子材仍著姚茂田等軍乘勝進攻並知會諒山夷官兩面夾擊迅掃邊氛一面檄飭各該地方文武於要隘處所實力嚴防毋稍疏懈東山寨等處匪巢林立經道員覃遠璉會同李雲梯各軍分路攻取將大虎巖一帶賊壘悉數踏平餘匪向歸順州大道墟等處遁去逆匪吳亞終勢力漸衰潛結鎮遠向武各股逆竄擾右江河道希圖牽掣官軍該逆負固稽誅正宜乘

此聲威一鼓聚殲著蘇鳳文嚴飭覃遠璉等會合下游巡防水師及劉玉成等軍奮力剿擊以期埽穴擒渠毋得遷延觀望貽誤事機將此由五百里各諭令知之○諭伊勒屯何瑄奏巴里坤哈密軍務緊急請催援兵一摺西路賊匪勾結哈密纏頭攻撲哈城雖經伊勒屯等派勇會同駐哈員弁將賊擊退而據獲賊供稱烏垣踞逆已會商土魯番各處回賊擬於三四月間分路東犯該逆等蓄意大股內擾巴城等處兵力孤單勢甚危急文麟景廉已抵安西玉門距哈密甚近何以屢次催令赴任猶復頓兵不救實屬大負委任著文麟景廉接奉此旨後卽日馳赴哈密將防守事宜妥爲布置儻再意存觀望必將該大臣等軍法從事成祿一軍圍攻肅州久無成效朝廷未加嚴譴特令移師出關至今尙未成行尤屬有意延玩著提督楊占鼐見在是否抵肅卽著穆圖善催令該

署提督速將肅州軍務接辦成祿交卸後卽日帶兵赴援關外不  
准稍事逗留如仍前玩泄貽誤戎機必重治其罪決不寬貸原招  
著鈔給文麟景廉成祿閱看將此由六百里諭知穆圖善文麟景  
廉伊勒屯成祿並傳諭何瑄知之○壬寅吏部以大學士曾國藩  
朱鳳標應定何殿閣請得旨曾國藩著授爲武英殿大學士朱鳳  
標著授爲體仁閣大學士○癸卯賜洪鈞等二百七十人進士及  
第出身有差○左宗棠奏臣由吳橋於四月二十日行抵甯津縣  
西關接劉松山等稟稱賊由茌平折竄四月十八日各軍追賊至  
平原城東適與賊遇見官軍至卽捨命狂奔劉松山張曜宋慶春  
壽喜昌共商乘夜銜枚急進襲之立破馬家集任家集李家樓十  
餘村騎賊四散竄走春壽喜昌衝出迤北各村踞賊亦卽驚潰生  
擒捻逆二百餘名斃賊數百名拔出難民數千二十日劉松山等

冒雨分率所部急追馳抵甯津屬白家集賊忽返闕遇積水窪下馬拒戰各軍奮威壓剿追殺二十餘里賊屍枕藉生擒逆二百餘名各軍帶傷弁勇三十餘名是日臣率所部及提督程文炳各營由吳橋抵甯津晤劉松山等商議分四路追賊劉松山張曜宋慶爲三枝向東北春壽喜昌率馬隊繼之臣與程文炳爲一枝向正北指滄州捷地減河二十二日未刻臣馳至減河南岸賈家莊晤善慶溫德勒克西知賊於是日辰刻猛撲減河經善慶溫德勒克西擊退賊南竄迤行而東恰與劉松山等馬步各軍相值如賊援減河南岸以向東北則馬步各軍與潘鼎新楊鼎勳防減河之軍可收夾擊之效偪賊海隅聚而殲之如賊徑向東南則劉松山等軍當於鹽山一帶截之而英翰丁寶楨所部復由武定迤西而來機局更緊臣一面遵旨將張曜宋慶程文炳春壽馬步各軍咨

交李鴻章總統聽其節制調度其郭運昌一軍則已經英翰奏歸

統帶矣臣拜摺後仍向鹽山一路前進以此時運河水勢尙旺河

閒一帶暫可無虞萬一久晴水落臣當急顧西岸之防俟到鹽山

後再定進止至臣之此行原爲滅賊起見就見在局勢而論防與

剿未可偏廢李鴻章意在先防後剿臣意在且防且剿兩者亦似

並行不悖若不顧大局不察時勢但執成見故相阻撓則亦難逃

聖明洞鑒也李鴻章奏接郭松林四月十六日稟稱該提督會

同吳長慶帶隊行抵博平縣城北探賊大隊又自南折而東趨郭

松林率馬步各隊追及賊騎散轡急遁小有斬獲該提督仍趕赴

東昌會合東皖各軍築牆憑河設守以杜竄越又據劉松山等稟

稱十五日會同春壽喜昌馬隊追抵高唐恐賊潛渡運西十六日

偪之博平以東賊突由茌平折竄東北剽疾異常十八日躡及平



原迪東賊又狂竄該提督等以逆眾絕不反拒無從痛剿乘夜襲之立破馬家集任家集李家樓合計擒賊二百餘名十九日賊竄至陵縣德平等處二十日追往甯陵該逆後隊橫出拒敵我軍分投猛壓追二十餘里擒斬甚多兩大始行收隊逆股復向東北狂奔各等語查該逆前竄天津未遂又乘我軍南下折而北趨不知滄州捷地壩已開減河灌水通海尙有潘鼎新楊鼎勳兩軍在彼扼堵也昨據潘鼎新稟稱減河東岸已修築長牆八十餘里水深丈餘足資守禦臣飭該藩司與楊鼎勳妥籌防剿必不任其竄過並密屬劉松山張曜等沿途緊追毋任喘息偷渡左宗棠已督程文炳等軍由吳橋甯津赴南皮一帶沿運河東岸扼剿臣料該逆知滄州減河有備南皮東光沿運又有游兵必卽折而南走仍由滄山陵回竄臣所部潘鼎新楊鼎勳旣在滄州以北郭松

林吳長慶又往東昌以南兩處皆緊要關鍵賊所必經之路臣僅帶周盛傳一軍駐扼德州咽喉偵察賊蹤相機截剿就見在局勢而論英翰丁寶楨已抵東昌兩路運防可期嚴密滄州減河牆濠既固津郡亦無他虞惟自滄州至臨清河道六百餘里見雖水深丈餘久晴必漸消落河西一帶毗連畿輔專恃民團捍衛臣實不敢放心疊奉諭旨以直省沿運防務責成左宗棠官文崇厚安商布置但運防未穩進剿仍不宜過急致有鋌而走險之虞上諭軍機大臣等捻匪由高唐博平折竄平原陵縣等處直趨滄州勢甚剽疾雖經劉松山等軍在平原夜擊賊營迄未痛加殲戮見在滄州捷地減河已開楊鼎勳潘鼎新等軍在該處築牆沿岸扼守將撲牆賊匪擊退逆蹤已向東南一帶逃竄左宗棠追剿之兵亦至插河南岸惟減河下游淤淺處所尙多著崇厚趕緊設法疏濬

並飭楊鼎勳潘鼎新等軍分紮減河力固北面至由滄州抵德州一帶沿河西岸向無兵勇僅恃民團堵禦不足以資扼守崇厚見咨令鄭魁士劉祺所部紮辭家窩泊頭與淮軍聯絡聲勢並飭余承恩由靜海滄州與楊鼎勳等軍協同迎截而泊頭以南仍屬空虛且鄭魁士等軍兵力亦單必須兵有後繼方可以資接應據崇厚奏稱已函商李鴻章就近籌辦卽著該大臣派兵力顧德州以北運防並著左宗棠定安恩承就近相機援應兼將運河西岸嚴密巡扼官文當速籌兵勇派赴該處力扼運西以資厚集儻任賊蹤搶渡河西擾及河間惟左宗棠官文崇厚等是問恐不能當此重咎也李鴻章見駐德州當督飭前敵諸軍儘力窮追毋任賊蹤稍行喘息並著設法繞前兜擊丁寶楨一面分軍與李鴻章所部合剿一面與英翰各軍嚴扼東昌臨清河防並著英翰酌抽得

力將弁與李鴻章丁寶楨所部分路兜剿迅圖殄滅本日復據左宗棠奏稱防剿情形一摺與李鴻章崇厚所奏大略相同該大臣見進軍鹽山一帶欲與英翰丁寶楨所部各軍蹙諸海隅以期局勢較緊所籌不爲無見惟賊蹤異常飄忽恐各路官軍未集而賊已乘隙他竄左宗棠李鴻章丁寶楨英翰等總當迅速乘機督軍會剿不可稍緩須臾致令賊蹤蔓延運河水勢消長靡定民團心志不齊難於深恃左宗棠當隨時相機兼顧不可稍涉大意東昌臨清德州至滄南一帶運防官文丁寶楨英翰當彼此兼顧聯絡聲勢以防賊騎回竄總須一面籌剿臨機相度不可偏執一見至左宗棠李鴻章均係督兵大臣前因賊竄保定等處左宗棠已抵直境距賊較近是以令其總統前敵諸軍嗣因賊竄山東距李鴻章行營較近是以將前敵諸軍改命李鴻章總統朝廷本係爲剿

賊迅速起見於該大臣等並無軒輊左宗棠見雖將張曜宋慶等軍交與李鴻章統帶亦當與李鴻章合力會辦不得稍涉推諉該大臣等同辦一事且見在駐紮處所相距不遠自應以國事爲重和衷商酌不可固執成見各分畛域前敵諸軍雖已交李鴻章調度左宗棠亦可就近檄勦以期迅速肅事將此由六百里各諭令知之○諭前因劉銘傳勦賊較爲出力且三月假期已滿是以諭令李鴻章傳諭該提督迅赴直隸山東一帶勦賊茲據李鴻章奏稱已兩次手書傳令到營襄助曾國藩亦爲懇切函催等語劉銘傳受朝廷不次之擢任重專閫邇來捻勢猖獗自應奮勇誓師滅此朝食以圖報稱且三月假期已滿般疾諒已全愈豈可藉病推諉自耽安逸見在捻逆倡處黃運之交各路大兵已集機會大有可乘李鴻章旣稱劉銘傳熟悉捻情卽著再行飛催銷假迅速到

營不准片刻稽延致誤軍事並著曾國藩吳坤修就近催令啟行  
見在軍事甚急若待添募兵馬必致耽延時日所部銘軍既派丁  
壽昌在邳州一爲操練卽可統率舊部鼓行而前必另行招募  
至湘淮皖豫各統將平日旣與劉銘傳相習該提督到營時卽著  
總統前敵馬步各軍奮勇剿賊以期迅奏膚功榮膺上賞該提督  
素日尙明大義當不始終延誤自外生成也銘軍啟行時如有應  
需款項著曾國藩代籌助給以利進行將此諭六百里諭知李鴻  
章曾國藩並傳諭吳坤修知之○甲辰諭軍機大臣等理藩院奏  
據土爾扈特汗布彥烏勒哲依圖報稱收畱厄魯特人眾請歸布  
倫托海辦事大臣妥爲籌畫並應給俸餉請飭戶部覆議各等語  
厄魯特人眾因伊犁失陷逃避土爾扈特游牧地方情極可憫而  
該汗布彥烏勒哲依圖竟能容畱洵屬深明大義第厄魯特人眾

寄居該遊牧地方究非久遠之計卽著交李雲麟明瑤錫倫就近將厄魯特十四佐領下官兵等妥爲安插酌給耕牧地方以資生計所需俸餉應如何支給之處著戶部覆議具奏原摺著鈔給李雲麟等閱看將此由六百里各諭令知之○諭總理各國事務衙門奏西疆毗連俄境各卡倫請飭建立界牌鄂博一摺新疆各城多與俄界毗連前經分界大臣與俄官會勘分定嗣以該處回氛不靖未能舉辦續據俄使照會內稱俄國官員擬從昌吉斯台至烏科卡倫一帶撤出中國卡兵其建立鄂博一端並請速定等語分界一事見旣可以設法辦理自應從速舉行著奎昌福濟車林多爾濟李雲麟明瑤錫倫咨商麟興榮全錦丕勒多爾濟速將分界事宜會同俄國邊界官員查明三年所分界址將應建界牌鄂博概行建立以固邊防原摺均著鈔給閱看將此由六百里各諭

令知之○乙巳諭軍機大臣等崇厚奏擒撲滅河淮軍截擊獲勝一摺擒逆大股由滅河以南撲犯于家橋等處經官軍追剿該逆敗竄慶雲所屬之舊縣匪蹤異常剽疾亟應速籌兜擊著左宗棠李鶴年懷遵二十五日諭旨迅速會商督軍進剿不可稍涉須臾致令賊蹤蔓延崇厚務將滅河下游淤淺處所趕緊設法疏濬與左宗棠等妥籌守禦毋稍疏虞左宗棠李鴻章當和衷共濟迅殄逆氛以副朝廷委任不得各分畛域貽誤戎機自干咎戾將此由五百里各諭令知之○予直隸陣亡提督羅雨春知縣杜恩祿等祭葬世職○是月豁免四川各土司三年租賦